

THE
CAROOLINE
LIBRARY

1695







XII

J J
d 16
11 11

XII

The Library of the
Wellcome Institute for
the History of Medicine

MEDICAL SOCIETY
OF
LONDON
DEPOSIT

Accession Number

Press Mark

STRAUSS, J.C.

65822/A

114

C

apud

THEATRO
LOND.

THERMÆ
CAROLINÆ.

LIPSIÆ,
apud JO. FRIDER. GLEDITSCHIUM.
ANNO M. DC. XCV.

111X

78.

LONDON MEDICAL SOCIETY OF

Comprehendere quemadmodum maxima,
ita minima difficile est. *Senec. Epist. 89.*

XII

Perillustri atq; Excellentissimo

DOMINO,
DN. FRIDERICO
à Rosspoth/

Potentiss. Elect. Saxoniae
à Consiliis intimis, & Inspectori
summo Comitatus Mansfel-
diae, &c.

*Domino ac Patrono sub-
missâ reverentiâ colendo,*

hasce pagellas
dedicat

AUCTOR.



*Perillusttris atq; Excellen-
tissime Domine.*



Uem Tibi cultum de-
beo summum, ve-
nerabundo obsequio
deferre jam sustineo.
Uti enim impulsu jus-
suque Tuo viles hæ perscriptæ pa-
ginæ sunt: ita primo omnium
conspectum ambire Tuum jure
meritoque debent. Ac Tuâ im-
primis beari tutelâ desiderant con-
tra maleferiatos, qui opellam hanc-
ce criminosa imputatione, mo-
disque omnibus proscindere alla-
borabunt. Diffiteri equidem non
possum, plus ferè in humeros
meos me recepisse, quàm vale-
ant

ant ferre. Imò negare haud præsumo, me festinabundum stylo passim brevioris usum, quàm penitior rerum repræsentatio requirere videbatur. Nec tandem reclamabo, si quis cuncta meliori ratione elaborata se daturum promittat. Neque enim mihi ipsimet satisfacio in omnibus, atque dum supra mensuram meam agere non nitor, facillimè patior, ut majorem alii de se fiduciam jactentque ac probent. At enim verò sunt quandoque in ferendo de aliis judicio prompti paratique homines, qui nihil quidem rectum putant, nisi quod ipsorum moribus conveniat; de suo tamen nil quicquam omninò produnt, multa, si non omnia, nescientes. Hi Pyrrhoniorum Scholas frequentasse videntur, qui novam o-

lim induxerant scientiam, NI-
HIL SCIRE. Verum nemini
litem movebo, etiamsi omnia
sciverit calleatque. Nolim tamen,
veneno malignitatis suæ oppri-
mat aut nihilum putet, quod sedu-
læ experientiæ & attentæ studii bene-
ficio hucusque licuit cognoscere.
Atque hoc idem est, quod devotâ
Tibi, Excellentissime Domine, o-
bedientiâ jam offero, submissè pre-
catus, ut favere levidensi scripti-
unculæ, nutuque Tuo favente fa-
voris publici viam aperire haud
dedigneris. Mereretur equidem,
fateor, admirandæ calidarum sca-
turiginis consideratio subtilioris
ingenii virum. Et tenuitatis meæ
conscientiâ manum calamo retra-
xissem, nisi quod Tu, DOMINE,
jussisti, negandi verecundia me
magis, quàm præstandi fiducia vi-
cisset

cisset. Quemadmodum verò hoc quicquid demum est, inter varias ad ægrotos excursions & itinera; maximam partem tumultuariâ operâ, & qualis esse properantium solet, consignatum est: ita nævos forsan & defectus passim occurrentes non rigidâ nimis censurâ taxatum iri confido. Id quod pro magnitudine Tuæ in me gratiæ mihi certò promitto, cuius deinceps quoque continuationem promptitudinis obsequiosæ plenus exoro

Perillustis atq; Excellentissimi Nominis Tui

Humili observantiâ ac
fide addictissimus

J. C. S.

A 4

De-



F. F.

DE thermis Carolinis earumque natura & legitimo usu paucis pagellis sententiam meam traditurus, id omninò præmonendum duco, me auctorem omninò nullum, & præprimis neminem, qui de hoc argumento antehac perscripsit, vel nominare velle, vel quicquam ejus minuentæ famæ huc pertrahere. Neque enim animum induxi, vel exscriptorem hic agere, vel meam qualemcunque opinionem ceu veram aut infallibilem obtrudere, sed in compendio saltem monstrare, quòd tot circumfusæ dubitationes certitudini locum non relinquant. Forsan subtiliori ingenio præditi excitabuntur inde, ut penitiori curâ indagare calidæ naturam sustineant. Tùm verò ex animo sum lætaturus, cum comperero, à vilibus hisce cogitationibus

occa-

occasionem quasi enatam esse inveniendi
viam ad laudes & famam nullo non tem-
pore perduraturam.

Non verò conatum longiùs petam; rem
ipsam potiùs aggrediar. A Romanorum
quodam Imperatore Carolo vel inventas
has esse thermas, vel usu saluari proba-
tas, ita ut ejus jussu & gratià oppidum sui
nominis deinde coaluerit, vel ipsa testari
potest appellatio. Utrum verò ex quorun-
dam arbitrato is Carolus fuerit IV. an ve-
rò Carolo Magno hoctribuendum, libe-
rum omninò opinaturis relinquo. Nam
hic posterior Aquisgranenses quidem ther-
mas restauravit, postquam in venatione er-
rabundus inter sylvas saltusque pede equi
rivos aquarum calidarum percepit. Quis
verò tam fortiter super assertum hoc mo-
rietur, non itidem Magnum, sed IV. Ca-
rolum Carolinarum fuisse auctorem? ma-
ximè cum & errori nomen idem possit an-
sam dedisse, & præterea expressâ auctoris
cujusdam relatione constet, Carolum Ma-
gnum omninò illarum primum existere in-
ventorem. Sed hæc curæ puto minutio-
ris esse. Neque enim hoc litigio tempus
determinatur, quo primum scaturire ince-

A 5 perint

perint thermæ, utut vel maximè ad hunc
vel illum Imperatorem inventionis gloria
deferatur. Nec ægrotorum interest illis
utentium, quo potissimum tempore, quo-
ve inventore fuerint recognitæ? Quodsi
tamen cuiquam asserere libeat, in admi-
randa rerum omnium creatione, DEUM
omnipotentem quoque thermas condidisse,
ita ut hæ cum mundo ætate pares sint,
utut diu delituerint, atque hæ citius, illæ
tardius innotuerint, næ ille non absurdè
adeò statuerit, quin assensum omninò a-
liquem mereri videatur. Non potest sa-
nè negari, imò laudibus nunquam satis ce-
lebrari benignissima Numinis providen-
tia, quâ non tantum vitæ & valetudinis
nostræ conservationi rerum omnium afflu-
entiâ à mundo condito prospexit, sed ut
haberemus quoque morborum, (quos præ-
vidit) remedia liberalissimâ manu conce-
ssit. Nolo hic extra oleas vagari prolixâ
deductione probaturus, vegetabilibus æ-
què ac animalibus, metallis & minerali-
bus in creationis actu inditam potestatem
esse, ut in morborum profligationem va-
leant, ac peti exinde medicamina possint.
Venerabundo pariter silentio involvo sin-
gula-

gularem DEI bonitatem, quā unam præ alia regionem respicere dignatus est, contra endemias ægritudines concedendo indigenam medicinam. Sed laudibus summis & perpetuā gratiarum actione extollendum beneficium est, quo omnium ferè medicamentorum vires in mirabili hoc thermarum fonte quasi coëgit potentissimi Conditoris sapientia. Enimverò quicquid vel purgantium vel plurimum alterantium remediorum in diversis aliis sollicitā mente conquirimus, congestum hīc abundantissimè id omne est. Ut adeò quotquot guttæ hujus calidæ impetuoso jactu profiliunt, tot indubitata divinæ misericordiæ documenta erga miseros mortales recognoscere valeamus. De cætero apud omnes in confesso est, absoluto semel creationis opere DEUM omninò nihil amplius de novo creare. Hinc à vero alienum non erit statuere etiam thermas sub mundi initio pro usu hominibus salutifero esse apparatus; non autem fortuito mineralium occursu continuò progigni. Id quod luculentius patebit, ubi perpetuæ & inexhaustæ scaturiginis causas paulò penitiùs pervestigaverimus.

Ad-

Admiratione omninò dignissimum est, aquas thermarum Carolinarum semper æqualibus viribus, calore, perpetuoque scaturiginis impetu per tot secula integras suffecisse. Ut verò non pauci in causam miraculi intimiori curâ inquirere allaborârunt: ita tot ferè sententias videntur effinxisse, quot capita fuerunt. Præcipuas illarum brevi recensione perlustrabimus, quid dubii qualibet alat paucissimis annotaturi.

1. Primò sunt, qui arbitrantur, aquas in terræ cavernis ab igne subterraneo per antiperistasin accenso, & ibi arctissimè incluso, tanquam in lebece incallescere, & ad effervescentem ardorem redactas cum murmurante impetu profilire. Mirari hîc statim subit, cur non in omni terrarum parte thermæ reperiantur, cum tamen ubivis præstò sit antiperistasis, & per hanc ignis subterranei accensio? Subaudire hîc videmur responsionem, non posse thermas progigni, nisi aquarum quoque copia adsit. Sed invalidam hanc rationem demonstrat quotidiana metallifossorum experientia, qui fodinas perreptando aquas copiosas easque frigidissimas sæpenumerò offendunt.

fendunt. Vis argumenti ita opinantium talis est: Ubi antiperistasis, & per hanc in terræ cavernis accensus, ibique arctissimè inclusus ignis, nec non aquæ concurrunt, ibi has necessariò tanquam in lebetè incalefcere, effervesce, & cum impetu proflire certum est. Sed verò quàm infirmo talo stet hæc consequentia, per modò adductam rationem puto liquere. Nolo prætereà prolixiùs objicere, quòd ignis semel accensus, & tot secula perduraturus, necessariâ lege pabulum requirat, & quidem indefinenter & æquali quantitate. Secus enim si fieret, vel extingueretur ipse, vel uno quàm altero tempore magis ferveret. Tum verò & ipsæ thermæ vel deficerent planè, vel interpolatis vicibus nunc majori, minori nunc calore pollerent. Et positò, quòd per dictam antiperistasin aquarum calor produceretur, non tamen sapor, non caterræ qualitates, quibus & alvum, & urinam, & sudores thermæ movent, inde poterunt derivari.

2. In has alii cogitationes delabuntur, ex aquis terræ centro circumfusi per solem subterraneum s. ignem copiosos elevari vapores, qui postquam à centro longius recesserint,

ferint, à frigoris vi denuò in aquas calidas condensentur, & aëris interni subtilioris interventu cum saltu projiciantur. Arduum sanè hoc iterum, & creditu perdifficile apparet. Quis enim vel citra phantasiæ elusionem imaginari sibi poterit, æquali semper semitâ, æquali copiâ, æquali tandem mineralium præsentia ac energiâ, vapores per terræ sinus ita vagari, ut tandem in uno quasi puncto in aquas calidas coëant, & violento nisu profluere per tot annorum seculorumque decursus non desinant?

3. Alii reperiuntur, qui calci vivæ, alii qui sulphuri, rursus qui bitumini, & qui lithantracibus &c. caloris thermarum causam assignare contendunt. Nolo autem quas quælibet harum opinionum difficultates patiaturs alias nunc attingere. Saltem id disputationem videtur habere: quomodo calx, bitumen, sulphur, lithantraces &c. possint indefinenter materiam calori suggerere, nec tamen vel seculorum edacitate consumi? an quicquid jugi aquarum affluxu iis dera sum est, perenni quâdam generatione statim restituitur? aut fortè sufficient saltem calcis, sulphuris, bituminis &c. halitus, qui thermales aquas calore

lore ac
quælo, ta
qui cana
feritur, c
pidibus,
rum cal
star cot
fatur?
nam no
sumti r
tantum
illud ea
sensibus
neralium
stantibus
4. Al
credibil
collision
contrari
alcalium
ti, quâ
Hoc not
tuntur, c
tus Viri
aqua for
calor val
auctio

lore ac viribus imprægnent? Sed unde, quæso, tanto dictorum mineralium ubertas, quâ canales lignei, per quos aqua ad balnea fertur, crassissimè induuntur? imò quæ lapidibus, lignis, ovorum putaminibus guttarum casui ad 24. horas circiter objectis instar cutis vel potius crustæ durioris adnascitur? Enimverò absurditatis, puto, culpam non effugiet, qui aut continuam absumti reparationem finxerit, aut halituum tantum ope thermas incalescere statuerit. Illud enim vix mente licet assequi; hoc sensibus vim infert, corpoream scilicet mineralium præsentiam ingenti satis copiâ testantibus.

4. Aliquibus quàm maximè visum est credibile, in terræ visceribus ex occurssu & collisione duorum salium naturâ suâ sibi contrariorum (ex acidorum nimirum & alcalium prosapia) effervescentiam excitari, quâ mediante aquis calor imprimatur. Hoc notis vulgò exemplis confirmare annuntuntur, quod scilicet ex commistione Spiritus Vitrioli cum oleo tartari, item quando aqua fortis ferro vel cupro affunditur, &c. calor valdè notabilis emergat. Sed & hæc assertio non vacat dubio, dum statim quæritur,

ritur, quomodo salia ista ab aquis absorptâ jugiter restituantur, ita ut præstò semper sint alia ejusdem naturæ, eâdem copiâ, eodem in loco, uniformem effectum jugiter producentia? Illud quidem inficiari nemo audebit, esse thermas salibus aliisque mineralium & metallorum particulis refertissimas; Sed hoc in quæstione est, an illa dicto modo fervoris in aqua thermarum reperiendi causâ sint, & unde dissipatis & expulsis succenturiantia jugiter suppeditentur, ita ut nunquam deficient?

§. Tandem missis quorundam sententiis (quæ tamen cum hæctenus recensitis maximam partem consonant) unicam adhuc memorabo, illorum scilicet, qui explosis reliquorum cogitationibus suas ceu infallibiles propinare nobis sustinent. Nimirum existimant, omnem omninò calorem à sole oriundum esse, nec ullum in locis subterraneis dari calorem vel ignem posse, nisi is prius à Phœbeja lampade fuerit accensus. Jam (ita scilicet pergunt inferre) sunt certa quædam terræ fossilia, in quæ sol radios suos penetrantissimè immittit, figit, eaque tam vehementi calcinatione afficit, & fortiter excoquendo ita exsiccatur, ut ea adve-

niens

niens postmodum aqua, veluti calcem vivam, sed ob metallicam naturam longè potentius, & cum impetu longè majori accendat, atque hâc ratione æstuantia illa subterranea vehementer exardescant. Quod si mineræ istæ durissimis profundissimisque montium cavernis inclusæ ab accedente aqua semel accensæ sint, tùm ab iis reliqua etiam mineralia in montibus hinc inde contenta, & ab aquis hisce adhuc intacta, unâ cum sole, & longè efficacius etiam sole, calcinari, exsiccari, & adeo torrida reddi, ut sic ad æstum recipiendum nunquam materia deesse possit. Verùm qui huic opinioni suum calculum adjicere haud vereatur, extra sensus affectusque positus sit oportet. Quî enim credere possit, solares radios per saxa rupesque ad intima usque terræ penetrare, cùm tamen noverit, quòd iidem extra terram, nec murum crassiorē, nec fornacem aut specum pervadant? quî patiatur sibi persuasionem indui, solares radios in profundissimis montibus fossilia calcinare, & torrida reddere, ut calcem vivam æmulentur, cùm tamen oculorum iudicio observet, quòd eadem fossilia in apicum posita talem calcinationem patiantur minimè? Quî

cœco assensu largiatur, modò memorata fossilia per centum, imò mille, annos dicto modo exuri nec tamen consumi? imò quì non alienum à veritate putet, quòd solares radii hyberno æquè atque æstivo tempore eundem producant effectum, cùm tamen interdum incidentes, interdum reflexi, magis aut minus perpendiculares sint. Enimverò supervacaneum duco plura indicare absurda ex modò memorata hypothesi subnascentia, cum quilibet abs se agnoscat, arenoso illam s. lubrico inniti fundamento. Hoc saltem addo, in explananda natura & origine thermarum absque cessatione scaturientium ita ad unum omnes se exhibuisse, ut animo veritatis avido minùs fecerint satis, relictà semper hinc inde dubitandi materià. Nam illud mihi haud difficulter quilibet dabit, quòd uniformis semper effectus uniformem quoque & variationis expertem causam requirat. Hanc verò in relatis hucusque hypothesibus inveniri posse quàm minimè, per breviter adducta puto facile patere.

Jam nondubito, benevolum Lectorem ex me quærere velle, ecquamnam ego credam perpetuæ hujus scaturiginis calidæ causam

fam pol
est quæ
dire, qu
quicquid
quàm
leam, a
præstan
absurd
minar
certitu
scatebr
uno co
re sapi
miseria
erit el
imò oc
lida m
femina
indider
dulo sal
rabile v
imò t
nenti c
quas, &
nem se
liunde
M. ben

sam posse statui rectissimè. Sed tanto hîc est quærere, quàm respondere, quanto audire, quàm definire sententiam faciliùs. Nec quicquam solidiori fundamento proferam quàm quòd æquè parum certi statuere valeam, atque alii statuerunt. Semper autem præstare arbitror, vel planè nullam, quàm absurdis plenam rei alicujus causam determinare. Sed verò hæc dubio procul incertitudinis culpâ vacabit opinio, quòd hæc scatebra immutabili impetûs & virium lege, uno eodemque loco prorumpens, singulare sapientissimi Creatoris donum sit, quo misericordiam suam miseris ægrotis voluerit elargiri. Et quamvis dubium non sit, imò oculorum fide constet, quòd huic calidæ multorum mineralium ac metallorum femina viresque imò corporeas particulas indiderit divina bonitas, attamen (pro modulo saltem mei dicam ingenii) imperscrutabile videtur, quomodo illa tot seculorum, imò tot millium annorum periodos indefinienti copiâ sufficere, ferventes efficere aquas, & uno eodemque loco citra variationem se exerere valeant. Enimverò non aliunde quàm à peculiari prorsus DEI T. O. M. benedictione hæc profluere omnia pu-

tandum est, qui tempore creationis potentissimo effatu jussit, ut hæ aquæ pari contentorum pondere, pari calore, & pari virium virtute sine fine perennent. Non improbare quidem sustineo aliquorum operosam solertiam, quâ illius rei causam infallibilem per quædam experimenta Chimiæ adminiculo eruere conati sunt: Croco nimirum Martis fortiori igne calcinato, aut Vitriolo nativo pariter calcinato aquam frigidam effuderunt, unde ebullitio & excandescencia secuta est maximè notabilis. Inde autem haud vanâ persuasione concludi existimârunt, quòd non tantùm juxta hunc modum in terræ visceribus thermæ elaborentur, sed & manibus quasi palpare, nunc earundem causas & naturam, imò pro lubitu tales nullo sumtu apparare valeamus. Sed ut silentio hîc involvâm, neminem unquam ex hoc fundamento thermas naturalibus omninò similes procreâsse, unicuique hæc paucula tantùm expendenda relinquam: (1.) an firmâ persuasione credere possit, in intimo terræ & montium per solares radios talem ferri aut vitrioli calcinationem posse contingere? (2.) unde nunquam emanens, sed emanans jugiter

ter æqualis ad hunc Crocum Martis vel vitriolum calcinatum aquarum affluxus? (3.) quomodo possibile, ut affluens exardescensque aqua omni momento plurimum memorata materiæ imbibens, eam extra terram impetuosè projiciat, hæc verò nullo non tempore præstò sit, nec unquam deficere observetur? Quod si vel obiter ratio ineatur; quantum aquæ spatium quadrantis horæ cum impetu protrudatur, simul verò computetur, quantum materiæ singula libra aquæ in se contineat, incredibilis apparebit summa ejus, quod 10. annorum (taceo quod 100. imò mille annorum) spatium egeritur. Atque ut facilius fidem dictis adhibere benevolus Lector valeat, brevi dabo experimento: Sinatur ex canali sive filano, qualem nostrates aquario apponunt, aqua per epistomium, vel obturamentò foraminis sublatò, exire in vas aliquod objectum, sic spatium quadrantis horæ illa ultra 125. mensuras accumulabitur. Quod si tantum uncia 32. s. librae duæ ponderis civilis mensuram efficiant, prodibunt spatium

$\frac{1}{4}$. Horæ 250. librae, s. 2 $\frac{1}{2}$. centenarii.

1. Horæ 1000. librae s. 10. centenarii.

B 3

Sed

Sed verò hîc fidem appello, non exoro
assensum, omnium eorum, qui thermarum
scatebras attentius inspexerunt, num vel de-
cuplâ quantitate ex voragine sua, cum im-
petuoso strepitu & saltu, ac pulsu quodam
repetito, thermæ prorumpant, atque vel ex
epistomio ad modum descriptum, aquæ
soleant decurrere? Neque tamen ita omni-
nò calculum instituiam, sed dimidium
quanti, quo minus sit errori locus, saltem
assumam, ita ut si profiliens thermarum
moles quinquies superet illam epistomio
profluentem copiam, tunc provenient
spatio

$\frac{1}{4}$. horæ 1250. libræ s. 12 $\frac{1}{2}$. centenarii.

1. horæ 5000. libræ s. 50. centenar.

24. hor. 120000. lb. s. 1200. centenar.

7. dier. 840000. lb. s. 8400. centen.

1. anni 43680000. lb. s. 436800. cent.

100. annorum 4368000000. lb. sive
43680000. centen.

1000. annorum 4368000000000. lb. s.
43680000000. centen.

Enimverò admiranda hæc est aquarum
copia indefinente impetu scaturientium.
Quantum verò illæ contineant materiæ, ju-
vabit nunc penitiùs considerare. Occasi-
onem

onem suggerit experimentum ante annos non ita multos susceptum à quodam cultore Chimiæ experto, eòdemque M. D. qui hortatu Patroni curiosi aquam thermalem, quid in sinu gerat, explorare peculiari modo Lipsiæ tentabat. Nec vanum, quidem hoc ipsius studium videbatur, inventâ scilicet materiâ, quæ post ulterius examen exhibuit (1.) terram insipidam. Hæc autem cum acido affuso vehementem ebullitionem excitavit, cæteroquin haud absimilis crustulæ illi salinæ, quæ aquæ thermarum refrigeratæ instar cuticulæ solet supernatare. (2.) Sal alkali fixum, quod itidem cum acidis efferbuit, de cætero autem omnes proprietates ostendit salis tartari calcinati. Peractâ supputatione deprehenderat, quòd in 28. ollulis (qualis nonnunquam quantitas aquarum uno mane assumpta sufficit; in quibusdam augenda est.) uncia una cum duabus drachmis reperiantur. Quamvis verò ex arbitratu meo visibilis hæc materia adæquata non sit pro contentorum multitudine, multò minùs pro causa operationis Carolinarum determinanda, attamen hoc in tantum accipiam, quòd dicta materiæ quantitas in singulis 28.

olulis, (quæ 4. mensuras vel 8. libras ad minimum replent) dissoluta fluctuet. Hinc porrò ita licebit inferre: Quando per quadrantem horæ 1250. libræ s. 12. cum dimidio centenarii aquæ calidæ impetuosè profiliunt, ceu superius demonstratum, tunc simul 12. libræ uncia tres cum duabus drachmis materiæ propelluntur; atque ita per horæ spatium 5000. libræ s. 50. centenarii exhibebunt materiæ 48. libras 3xiiij. per 24. horas provenient materiæ XI. cent. $71\frac{1}{2}$. lb. per 7. dies LXXXII. centenar. $\frac{1}{2}$. lb. per annum 4264. centenar. c. 26. lb. per ann. 100. 426426. centenar. per ann. 1000. 426426000. centen.

Ut adeò ex hac deductione intelligi queat facillimè, nodum illum Gordium à nobis sæpiùs tactum de tantæ molis materia, ejusque continua absumptione, & tamen eodem in loco, perpetuo proventu, & æquali præsentia, solutionis conatum omnem eludere, atque unde nexus incipiat, quòve se condant, nec ratione, nec visu percipi posse. Valeant itaque illi, qui vinculum hoc arctius implicatum suo asserto de fossilium per solares radios in intimo montium calcinatis, & cum aqua scaturiente eructatis jam resolutum

lutum esse arbitrantur. Ficulnea licet & infirmissima tela pronuncient negationis nostræ, quod tanta solis atque caloris vis ad profundam fossilium matricem per saxa rupesque descendere nequeat; nunquam tamen in suas nos partes pertrahent, nisi solidioris probationis argumento, quàm usitata ipsi principii petitione fuerint instructi. Nos interim brevi sententiæ nostræ superiùs jam declaratæ repetitione venerabundi agnoscimus divini Numinis ordinationem, quâ thermas æquali contentorum & energię vi eodem in loco prosilire iussit perpetuâ sic lege perennaturas. Quod si tamen aliis liceat felicioribus esse in perscrutanda & invenienda thermarum natura, nos ipsis ex toto animo gratulabimur. Caveant tamen, ne scyllam à nobis monstratam evitaturi in charybdin incidant minùs forsitan prævisam.

Nos verò nunc progrediemur, quantum licet indagaturi, ecquid in se contineant thermæ, & quæ præstans generosissimæ operationis vis sit?

Initio advertimus diversorum in hac re diversam solertiam. Quidam enim destillationis beneficio, quidam præcipitatione,

B 5

cum

cum aliquorum liquorum affusione, nonnulli etiam evaporatione, vel exhalatione, experimenta solent suscipere. Sed quantum vanitatis hoc illorum studium habeat, libero cujusvis iudicio permittam.

Nam quod (1.) ad destillationem attinet, in vulgus notum est, illam, quocunque modò [scilicet vel per cucurbitam cum super imposito alembico, vel ad latus per retortam] demum adornetur, non nisi ignis adminiculo peragi. Quod si jam fluidum, aliquod destillationi subjiatur illud igne, motore mox exagitatur, ita ut & volatiles quas secum habet partes, & simul vapores dimittat. Tùm verò sic excussæ fluidum constituentes particulæ, facilè in minores discerpuntur, adeoque ut illarum magnitudo, sic & figura & situs ita mutantur, ut reverà quales erant antea, non appareant amplius. Si plus ultra invictus tendit ignis impetus, dum quasdam mixti destillationi expositas particulas minimas, oculi aciem vel microscopio armatam effugientes destruit, nonnullas distrahit, atque vi quasi expellit. Imò licet vitra Hermeticè sigillentur, non tamen illæ in his retinebuntur, per poros visum non deprehendendos, exitum inventuri.

Id

Id quod temerè non negabunt, qui doctif-
 sima Anglorum quorundam scripta perle-
 gerunt, asserto huic fidem prolixiori proba-
 tione facientia. Enimverò ejusmodi mi-
 nima in natura reverà dantur, quæ sensus
 planè non incurrunt; si tamen inter se coë-
 ant cohæreantque, in corpora satis magna
 compinguntur, à quibus etiam deinde ite-
 rum exhalant. Nolo hîc tædiosâ repetiti-
 one referre, quæ à doctioribus hujus rei do-
 cumenta proferuntur, longè plurima. Sal-
 tem hæc attigisse paucula sufficiat, quòd ob-
 servemus vinum ab infuso vel croco metal-
 lorum, vel vitro antimonii, vim emeticam
 contrahere, cum tamen utrumque etiam
 post plures infusiones nihil de pondere suo
 amisisse videamus, Nihilo tamen minus
 necesse est, aliqua minima de illis ramenta
 incredibilis parvitatis vino concessa fuisse,
 cum aliàs ipsi emetica qualitas absque sub-
 jecti cui inhæreat, communicari haud po-
 tuerit. Par sanè ratio, est Mercurii in aqua
 sic dicta Hermetica contra vermes; item
 antimonii in decoctis sudoriferis depurati-
 oni sanguinis inservientibus, quorum ab u-
 troque liquoribus, quibus infunduntur,
 quedam inferantur minima oportet, ut ut de
 pon-

pondere ipsorum nec minimum decessisse
 appareat. Quod si itaque talia minima per
 ignem dissipentur vel abigantur, ineptum sa-
 nè foret, substantias illas in destillationis la-
 bore cōspicuas, sive prolecti phlegmatis, sive
 falis, sive mercurii aut sulphuris denique &
 terræ damnatæ larvâ oculis subjiciantur, pro
 veris principiis sive elementis rei destillatæ
 venditare. Quis enim se sponso rem da-
 bit, vel certò decidet, utrum illæ per destil-
 lationem secretæ & disjunctæ substantiæ
 concreto integro actû inextiterint antea,
 adeoque saltem separentur; an verò potius
 per ignem simul veluti commutentur, mu-
 tatâ scilicet, ut antea dictum, minimorum
 figurâ, situ, cohæsione & coagmentatione,
 imò per colliquationis aliqualem modum
 nova parentur. Ut adeò facîle sit collige-
 re, probationem thermarum pro invenien-
 dis illarum contentis hoc modo institutam
 vano prorsus conatu suscipi. Id quod vel
 inde à posteriori, quod dicitur, elucescit,
 quòd quamvis protrusæ per destillationem
 substantiæ cum residuo commisceantur, ac
 artificio laboriosissimo denuò combinētur,
 nunquam ita tamen sibi connubant iterum,
 ut thermarum aquas omninò referant ac
 postliminiò reddant,

(2.) Quod præcipationem spectat, ne-
mini ignotum est, quod per hanc particulæ
ei solutæ ex poris solventis interventu cu-
usdam tertii deturbentur, quæ liquorem an-
teà clarum obscurant, paulatim verò subsi-
dendo vel fundum vasis petunt, vel ad supe-
riora tendunt. Causa, cur ita particulæ è
vis poris extrudantur, una non esse videtur.
Interdum enim aucta illarum moles, dum
nimirum ex præcipitante ipsis aliquid adhæ-
ret, in poris angustioribus contineri nequit.
Interdum quoque per præcipitantis affusio-
nem pori nimium vel constringuntur vel
axantur, ut ita particulæ contentæ exclu-
dantur, de quo utroque non unum exem-
plum in promptu esset, si adducere talia ad
præsens negotium quicquam pertineret.

Saltem quoad primum modum hæc pau-
cula memoro, quod observemus magisteria
vegetabilium in duplo ferè superare pondus
vegetabilis soluti, aperto indicio, quod ab
affusi præcipitantis particulis hujus quoque
minimis moleculis aliquid quasi accreverit.
Sic in rectificatione, quam dicunt, spiritus
vini sine destillatione simile quid depre-
henditur, dum nimirum sal tartari in cruci-
bulo probè calefactum illi spiritui oppidò
pa-

parùm à suo phlegmate liberato certâ quantitate inditur, atq; vas extemplò obturatur. Tùm enim post aliquot horarum spatium, supernatante spiritu phlegma in fundo reperitur gravius, alcalicis scilicet saturatum particulis, id quod præter saporem & tincturam lixiviosam ex pondere sensibilibiter aucto cuius de facili innotescet. Nolo autem hîc plura accumulare, quibus evinci possit, præcipitationis medio larvam tantummodò contentorum ex præcipitantis adhæsiōe enatam, non veram illorum faciem obtineri, adeoque certum de iisdem iudicium hâc ratione ferri non posse. Nam sicut necessariò particulæ aliam sic induunt figuram, magnitudinem ac situm: ita nostris sensibus non possunt non aliter sese præsentare atque ab iisdem judicari.

Taceo nunc lubens, quòd eadem in liquore quodam fluctuantes particulæ pro diversitate præcipitantium, per quæ poris suis expelluntur, varias attriciones, divisiones aliasque alterationes patiantur, adeòque pariter figuras, colores atque situm mutant. Sic mercurii sublimati cum aqua vel forti vel communi facta solutio, si cum oleo tartari per deliquium præcipitetur, rubicundum
sive

sive mixtum pulverem; si cum calce viva flavum, & cum Spiritu salis Ammoniaci album dimittit, indubitato argumento, mercurii particulas variè affectus fuisse, earundemque figuras & situm transformationem quandam perpeffas esse.

Cùm itaque hâc ratione constet, in super-
vacuo præcipitationis labore operosam sed
frustraneam collocari sedulitatem, pau-
cissimis adhuc pervestigemus, quid tertio
tandem evaporationis beneficio expectan-
dum sit. Non verò quempiam latere faci-
lè potest, illam vel vase aperto, vel leviter
saltem chartâ tecto peragi, idque vel calore
balnei, vel arenæ, vel fornacis calidioris im-
positione, &c.

Quocunque verò demum modo fiat,
semper tamen humiditas aquea paulatim
exhalat, cui si partes simul volatiles atque sa-
lino-sulphuræ sint immixtæ, hæ simul ex-
spirant, remanentibus in fundo crassioribus
gravioribusque. Jam si hæ ipsa ad rem
præsentem applicemus, ecquis crediderit te-
merè, desideratum hoc modo scopum ob-
tineri, i. e. vera thermarum Carolinarum
contenta sic ob oculos poni? maximè post-
quam experienciâ vel millies confirmatum
est,

est, si calidissimæ sorbeantur aquæ, operati-
onem ex voto succedere; deficere autem s.
corrumpi potius in corporis tormentum, si
tepidæ aut refrigeratæ assumentur. Unde
necesse est colligere, quod si abs se fatiscen-
te thermarum calore vires simul deperdan-
tûr, sine dubio harum jactura longè major
ab evaporatione metienda sit, residuo certè
nihil certi de contentis indicaturo.

Sed utut hæc se habeant, videas ramen,
qui de his thermis unquam commentati
sunt ad unum omnes de contentorum mul-
titudine multa, sed unò ore pariterque unâ
serie referre. Sic suspicari omninò licet,
semper alterum alterius vestigia legis-
se, & vel ideò persuasum habuisse, has &
illas mineralium metallorumque partes in
thermis contineri, quoniam antecessores
sic putârunt. Enimverò Romano-Catho-
licæ hoc fidei documentû est credere, quic-
quid credit Ecclesia; Sed non itidem asseren-
dæ veritatis indicium est, pro vero habere,
quod verum esse ab aliis judicatum est. Ita
verò observamus omnes & singulos perhi-
bere, quòd thermis hisce Carolinis insint la-
pis calcarius, boli varii generis, nitrum, a-
lumen, minera Martialis, vitriolum, vapor
bitu-

bituminosus cum volatili sulphuris spiritu;
quibus aliqui venam auri & cupri simul ad-
jungunt. Non tamen aliud quicquam re-
peritur in ipsorum scriptis, quò demonst-
rari hujus opinionis certitudo queat, quàm
materiæ cum aquis projectæ varietas ipsa.
mineralia diversis coloribus in oculos o-
mnium quasi ingerens. Sed verò quis o-
mnia illa revèrà vidit? ecquis spiritum sul-
phuris volatilem in thermisprehendit?
ecquis reliqua? imò si quis illa in univer-
sum cuncta revèrà in muris & canalibus, ad
quos thermarum aquæ alluunt, ostendere,
intuentibus queat, quis asseverare sustineat
sub avolatione humiditatis mera tantum-
calidarum contenta concrevisse, spreto
prorsus aëris imperio, quod ille in rerum
combinatione s. coagmentatione exercere
alioquin solet. Nam neminem latere fa-
cile potest, quod unum idemque subjectum
diversam omninò faciem pro aëris, cui ex-
positum, diversâ crassitie, atque hinc pressu-
râ magis aut minus conveniente exhibeat.
Ut adeò difficile futurum sit conjicere, ad
quam mineralis speciem hoc vel illud re-
ferendum sit, cum diversa unius ejus-
demque pro aëris diversitate conditio facile

C

possit

possit observatorem illudere. Adhæc si
reverà paulò ante memoratà materiæ [non
quicquam aliud præterea, ceu vulgò in scri-
ptis asseritur] in thermis continentur, has-
que constituunt, cur ex iisdem in subtilissi-
mum pulverem redactis, atque ebullienti a-
quæ remixtis non novæ parantur thermæ?
cur idem effectus, qui calidarum aliàs po-
tum consequitur, se non prodit, si ejusmo-
di liquor paratus magna dosi bibatur? Præ-
terea autem mirari subit, auctores in defini-
endis thermarum contentis planè non re-
spexisse ad operationem ab ipsis proficisci
solitam. Unde enim catharticam vim,
eamque haud proletariam nunc deducunt?
non sanè à lapide calcario: non à bolo aut
nitro: non ab alumine, aut vitriolo: non
à marte aut bituminis vapore, sulphurisque
spiritu. Qui enim naturas singulorum per-
spectas habet, haud difficulter advertet, illa
omnia adæquata non existere pro exhausti-
enda thermarum purgandi, diuresin & su-
dore simul movendi facultate. Ergò præ-
ter illa aquarum elementa aëris occursum in
& sub aqueæ humiditatis exhalatione variè
cōbinata, quæ nunc boli, nunc vitrioli, mox
mineræ Martialis, aut lapidis calcarii larvâ
se

se sistunt, aliud quid lateat oportet, à quo mirabilis operandi potestas proveniat.

Quamvis verò jejunum foret, hanc ingenii mei labore figurare, cùm superiùs dixerim, sapientissimi Creatoris jussu perpetuas thermarum vires coaluisse; humano scrutinio facilè non evolvendas; absurdi tamen nil puto, inferet statuere, in particulis longè minimis sensum omnem effugientibus, & volatilitate, quæ dicitur, summâ præditis potissimum ἐνέργειαν esse reconditam. Habet quidem quandam veri similitudinem nonnullorum conjectura, fumis quasi metallicis iisque salubribus, mineralium, metallorumque primo ente turgidis, imprægnari thermarum aquas. Ac sicut subtilitate illi maximâ gaudeant: ita mirum non esse, si & eorum operandi vis se exerat longè excellentior. Jam pernosse illos, qui interiora terræ æris eruendi causâ perreptant, quòd aër in quibusdam fodinis benignus, in aliis admodum noxius deprehendatur. Atque id quidem pro varietate minerarum hîc vel illîc obviarum solere contingere, ita scilicet, ut e. g. mineræ solares, Lunares &c. exhalationes eructent haud malè sanas; arsenicales è contrario venenatas.

Hinc attentiore cogitatione aliquem sibi fingere posse, antimonialibus, nitrosis, &c. fumis ita calidas hasce aquas esse plenas, ut inde aperiendi, purgandi, lotiumque & sudores provocandi virtus resultet. Verum hinc statim nova dubiorum seges oritur. Quis enim temerè crediderit, auram mineralem ex ejusmodi tantum mineris efflari, quæ aliàs in valetudinis commodum medicamenta præbent. Eadem scilicet ratione, atque nemo facillè fidem dederit, in fodina v. g. Joviali, ubi plurimum æris stanno divitis [quod *Zwitter* nominant] eruitur, non alios nisi exhalationibus Jovialibus refertos fumos reperiri? cur non altera minera, quam *Wolffram* vocant, suum conferat symbolum, cum hæc intermixta æri stannifero tantum non semper inveniatur? atque hanc veneni non expertem norunt per ignem exploratores. Jam probabile omnino est, ipsius elementa formalia simul in fumis istis contineri. Et positò ex minera Joviali solum vapores elevari, an proinde nihil nocivi metuendum? quis unquam vidit glebam stanni plenam adeò puram, ut heterogenii nihil, nihil noxii (*Unart* appellant) admistum fuerit? adhuc quis

quis sponfor erit, nullas fortè fibras occultas (heimliche Klüfte) aperiri, quæ effluvia aliorum mineralium aut metallorum emittant? enimverò subdola, imò falsa hæc argumenti vis est: hîc minera effoditur hîc vel illò metallò aut minerali grvida; E. non alii, quàm inde resultantes fumi volitant. Id quod per hætenus dicta facilè evincitur. Sed & hoc tantisper concedamus, minima illa, quibus operandi vim maximam attribuimus, sub fumi mineralis schemate aquis insinuari; quis verò toties memorato dubio, quod hîc quoque implicatur, satisfaciet? quomodo fumi minerales eadem semitâ, eadem quantitate & qualitate, eodem modò thermis immergantur, idque sine ulla prorsus intermissione? Enimverò quicquid hîc effinxerit ingeniosa quorundam sedulitas, id omne rationum infirmitate laborare facilè advertet curatiùs examinaturus.

Ego qui obtusioris ingenii conscientiam me metiri optimè novi, malo hîc fateri ignorantiam meam, quàm cum perpetuo dubiorum recursum me committere. Manebo tamen intra hanc mensuram meam, si dixerò, thermarum aquas mineralium metallorumque diversorum diversis particulis,

summè nimirum volatilibus partim, partim fixioribus & crassis divinâ benedictione ita esse refertissimas; ut si bibantur, & alvus, & urina atque sudor inde valeat provocari; modum tamen mixtionis ac perennantis scaturiginis citra conjecturæ lapsum haud posse omninò determinari. Pari ferè ratione atque solidâ concreta observamus longè plurima, ignis adminiculo reclusa, substantias præbere diversissimas, sui tamen cohæſionis modum & proportionem indaganti non prodere. Sic notum est, ex minera illa, quam **roth gûltig Erz** vocant, laborantium solertiâ spiritum subacidum & sulphur aureum prolici: ab aliis alio modo oleum inde provocari quodammodò rancidum, residuo saliformem materiam exhibente. Sic illud mineræ vulgaris genus, quod **Glantz** appellant, pro vario scrutantis labore varias dimittit substantias, sub uno tamen simplici que obtutu non deprehendendas. Ut nihil nunc memorem de bismutho & minera ♂ Hassiaca, quæ ambo sub vario tentamine explorata vel mille materias sistunt. Quis verò temerè crediderit, illas eâdem facie, & solas, non plures, in dictis speciebus æris præextitisse, nil verò illarum

rum vel avolâsse, vel sub violenta ignis imperio aliam induisse figuram? aut quis à priori determinabit, quâ ratione contenta sibi invicem connupserint, atque in tale concretum coaluerint? Ita sine dubio etiam concreta fluida diversissima mineralium metallorumque salia sub uno componere, ac continere liquore possunt, quorum omnium tamen modum mixtionis à priori describere impossibile omninò fuerit.

Nunc autem porro disquiritur, utrum internus thermarum usus in sanitatis emolumentum conducat? an verò potius invaletudinis periculum inde immineat? ridiculosæ simplicitatis quidem foret, priorem quæsitam partem negare, cum innumera à thermarum potatione restitutorum exempla salubritatem abundè testentur. Hinc supervacaneum puto hîc allegare personas ferenissimo fastigio celebres aliasque humili sorte viventes, omnes tamen communi internoque thermarum usu ad sanitatis perfectionem reductos. Sed alterum quæstionis membrum quam plurimi haud absque ratione affirmari posse arbitrantur. Cum enim cuivis ad oculum pateat, quòd non tantum canales lignei, quibus aquæ calidæ

in domos derivantur; sed & ipsa balnearia aliaque res variae vel guttarum saltem casui objectae, brevi horarum 20. vel 24. spatio, crustam quasi induant petrosam, hinc pertimescendum esse opinantur, ne simile quid in bibentium corporibus contingat. Semper enim aliquid harere posse, ut inde vasa mesenterii lactea repleantur aut obturentur tophaceâ quâdam materiâ, in praesentissimum valetudinis detrimentum. Imò calculo obnoxios omnino à thermarum usu arcendos esse, quòd inde lapillis in renum sinu vel etiam extra illum latentibus sine dubiò saxei aliquid accrescat, adeoque magis intendatur augeaturque malum, quàm minuatur.

Sed verò vanus hîc metus, vana tantùm persuasio est. Quod topi ab aqua enascantur, si nimirum illa fuerit refrigerata, autopsia cujusvis comprobatur. Quamdiu autem in olla super prunas detinetur, coire in saxum nunquam observabitur. Ergò idem hîc, quod cum aliis solutionibus in chemia obviis solet accidere. Nimirum quamdiu in poris liquorum per calorem dilatatis contenta spatium necessarium obtinent, tamdiu in iisdem permanent, visusque

aciem

aciem effugiunt. Simul ac verò frigoris vi
pori constringuntur, quasi & fiunt angustio-
res, tunc denegato contentis spatio, debito
ipsa vel ad fundum, vel ad superficiem ex-
cluduntur, visuique se postliminiò sistunt.
Ergò ante refrigerationem pati thermæ de-
bent, aërisque simul liberioris vim experiri,
quàm coagulentur, aliisque rebus accre-
scant necesse est.

Quis autem crediderit in viventium cor-
poribus, ubi calor satis notabilis abundat, si-
mile quid contingere posse? maximè cum,
& aëris liberior accessus denegetur, ac præ-
tereà natura sui conservatrix ut aliàs excre-
menta particulasque crassiores pro nutriti-
one ineptas, expellere solet, ita quicquid ab
epotis thermis terrestrioris forsan materiæ
separetur, potius exturbabit, quàm relin-
quet. Ut taceam ab aliis allatam rationem
in animalibus varii generis post mortem dis-
sectis nunquam tophos reperiri accretos,
cùm tamen ea pabulum omne thermarum
aquâ subactum jugiter accipiant. Cùm ita-
que hâc ratione plus calidæ istius per singu-
las anni septimanas illa in se recipiant, quàm
totò curæ decursu adventores ebibunt, du-
bio procul in ipsorum defunctis corporibus

lapidifica aquarum visprehendenda esset, cuius tamen ne minimum vestigium appareret. Subaudire hîc mihi videor haud levem objectionem, quòd unus vel alter calculo obnoxius à repetito thermarum usu dolores incurrerit graviores, quàm unquam antea, imò lapillos inde excreverit longè grandiores. Hinc facilem conclusionem; thermas potiùs calculorum incremento, quàm imminutioni aliquid conferre. Verùm aliam hîc rationem subesse, facilè advertet citra præjudiciũ animi rem penitiùs paulò pervestigaturus. Dolores utique potuerunt ingravescere, ex distensione nimirum universi renum parenchymatis, cuius minimos tubulos & canaliculos thermarum aquæ repleverunt ac pervaserunt haud tantum; sed & vi suâ lithontripticâ calculos majores firmiùs alicubi hærentes sede suâ tandem moverunt. Hi verò perverso forsitan situ, aut plures numero simul ureteres ingressuri, immanes sine dubio dolores excitârunt. Sed tamen à posteriori hoc ad beneficium potius ingens putare convenit, quàm infonti calidarum potui dicam scribere. Majus enim periculum metuendum, fuisset ex diuturniore calculorum retentione,

ne, cū dubio procul ex eadem, quā antea, materia paulatim grandiore molem fuissent acquisituri, ac forsan aliquando pelvim, ubi in ureterem se exonerat, penitus obturaturi. Et tale quidem exemplum fœminæ cujusdam liceret adducere, quæ per undecim dies omnimodā urinæ suppressione laboraverat. Hæc extincta & aperta utriusque ureteris principium calculo grandiore, quasi cuneo obsessum exhibuit, ut inde ne gutta quidem lotii ex renibus potuerit descendere. Regurgitavit autem hoc in massam sanguineam habitumque corporis, ac in capite imprimis substitit, unde epilepsia & mors infecuta.

Sed cū hoc à scopo nostro abeat, nolo id prolixiore recensione persequi. Potius aliam aliquorum dubitationem subnecto, qui hydropem ex copioso calidarum haustu produci arbitrantur. Nec frustra quidem hoc sibi persuadere opinantur, cū ventriculi & intestinorum imperio tam vasta aquarum epotarum quantitas haud pareat, sed vel invitis elabatur mox habitum corporis occupatura. Verum enim verò nec hoc dubium à legitimo thermarum usu quempiam absterreat. Ex superius enim dictis oppidò

pidò liquet, illas mineralium metallorum-
que subtilissimis particulis refertas esse.
Hæ verò otiosæ non sunt, sed ventriculi po-
tius actionem hîc certo modo adjuvant ma-
gis, quàm eludunt. Et posito, quòd citò
per intestina & vascula mesenterii minora
sive lactea transeant penetrentque in habi-
tum corporis, num inde statim hydrops o-
rietur? Id quidem potatores sæpiusculò
observant, quòd brachia cum pedibus à po-
tu calidarum tumescant. Verùm & hoc
annotant, quòd post primum vel secundum
balnei usum statim tumor evanescat omnis.
Ergò tantum abest, ut hydropem excitent
thermæ, ut potius illum profligere valeant,
sicut exempla quamplurima testantur, & ob-
servaciones inferiùs memorandæ fusiùs con-
firmabunt. Tandem quantum ponderis
habeat majorum aliquorum auctoritas, qui
internum thermarum usum averfati peni-
tùs sunt, pauculis tantùm placet adjicere.

Statuerat scilicet Medicus quidam erudi-
tionis laude & praxeos felicitate celeberr-
mus, non sine valetudinis summo periculo
intra corpus assumi thermas Carolinas. Ra-
tionem semper adjunxerat suo asserto, quod
nimirum Præceptor olim suus, Vir famæ
maxi-

maximæ, vel centiesprehendisset, neminem, qui istas ita hauserit aquas, in tertium usque annum vixisse.

Ego verò ægrotorum curam postea suscipiens memor istius moniti; fidelissimo [ut opinabar] consilio suasi adituris has thermas, ut internè illis uti omninò refugerent, nisi periculo mortis certissimo se immergere vererentur. Atque ut dicto fidem adstruerem, semper istius veterani Medici observationem instar regulæ quovis auro pretiosioris allegatam, quâ certè aliqui permoti à potatione calidarum abstinuerunt. Sed post 10. circiter annos ipse cum ægroto illustri thermas accedens oppidò multos conspexi, qui ante 10. & plures annos illarum vires salutares experti tùm denuò ad ipsas confugerant. Aderat simul percelebris civitatis cujusdam montanæ Consul, qui 36. annos continuos illarum auxilio nixus octogenarii propè ætatem vegetus attigerat. Cùm ergò expertem veritatis reperirem toties oggestam laudati Medici experientiam, facillimè sententiam mutavi, & per 14. nunc annos ægrotis longè plurimis tutissimum hoc sanitatis præsidium suasi, quod sanè tantum non omnibus in valetudinis emolumentum.

mentum cessit. Etenimverò suadere deinceps idem quoque non desinam

- - *dum spiritus hos reget artus.*

Verùm cum ex dictis hactenus satis elucescat, thermas potas innocentia ad omnem legem exacta frui, non immerito nunc in tempus inquiritur, quò illæ validæ magis, adeoque ad usum utilissimæ deprehendantur? permultos enim occupavit opinio, veri primas omnino deberi, universo scilicet naturæ ambitu ad jussu divinum tunc se renovante. Quod si verò superius à nobis tradita huc revocentur, ut nimirum potentissimi Creatoris nutu hæc calidarum scaturigo prorsus immutabilis creata, & usque huc conservata est: ut pari omnino impetu atque calore, uno tempore æquè atque alio protrudatur, haud difficulter patebit, illam renovationis legem ad ipsas thermas non pertinere. Has tamen hiberno æquè ac verno tempore suam virtutem ad bibentis votum exerere, multiplex ostendit experientia. Imò testantur ibi habitantes Dni, Medici, aliquos ante hæc militum duces hiemali tempore [quod alio non licuerit] optato successu calidas assumisse. Et non sunt prætereà loci incolæ idem sapius experti

perti, quòd quòvis anni tempore easdem thermæ vires soleant probare. Verno autem majorem observari adventorum confluxum, vel societatis causâ forsan fit, quoniam tunc ipsâ numerosiore occasio ad varias cum lusu recreationes parata est, vel quod suâ præconceptæ opinionis verissimum habeatur, illo anni tempore vim & operationem illarum conspici potiozem. Cæterum sicut exuperans M. Julio æstus, atque incommòdum pro itinere ac balneo hiemale tempus curæ locum non relinquit: ita Majus, Junius, Augustus & September hanc sibi prærogativam vendicare videntur. Imò posteriores duò menses certâ ratione, reliquis ferè prævalent, æstu nimirum tunc plurimùm remittente, habitaculis commodioribus quoque inveniendis, & societate retrò crescente, ac curam minus inturbante. Saltem id dubii quorundam adhuc animos habet; num uno anno præ alio majori thermæ salubritate fruantur? Cum enim impetuosa, frigida, & aquosa tempestas sæpenumero admodum diu continet, vitium inde thermalibus quoque aquis affricari arbitrantur. Imo si hiems immodestior præcesserit, ac gelu terram ad
ulnas

ulnas aliquot congelaverit, non posse non fieri putant, ut insequenti vere inertes illæ ac nocuæ deprehendantur, ac necessariò curæ procedant infelicissimè. Nam ab egelida terra ac aliunde plurimas cruditates infundi thermis, quæ turbare potius, quàm sanum præstare corpus, imò seminia morborum alicubi delitescencia excitare potiùs quàm pessundare valeant. Atque hæc omnia experientiâ hujus ipsius anni referunt comprobata. Nam permultos ajunt ab epotis aquis vehementer læsos, invalescente scilicet inde ipsorum invaletudine. At verò hunc nodum difficilem difficilè forsan non erit dissolvere. Quòd aëris qualitas, quæcunque demùm fuerit, ne minimam quidem mutationem calidarum scaturigini afferat, quilibet de facili cognoscet penitiùs consideraturus, ex quanta profunditate, & quàm admirando prorsus ac citato impetu profiliat. Enimverò nec illabentes pluvix, nec ab egelida terra confluentes aquæ ipsi possunt admisceri, aut labem insinuare, jugi propulsione impetu id prohibente. Et quomodo quis, defixo attentius in scaturiginem obtutu, sibi poterit persuadere, in toto isthoc tractu, quo sub terra ferventes hæc aquæ

aquæ copiosissimâ vaporum calidorum di-
 missione proveniunt, inclementius gelu ni-
 dulari posse? Ac posito tale quicquam repe-
 riri, ecquis citra spontaneam sui illusionem
 firmissimè credet, eo in loco, ubi vaporatio
 calidissima penetrat pervaditque omnia,
 congelationem vel per X. dies, [ne dum in
 Majum usque & Junium] perdurare, tunc
 verò resolvi, ac nascente exinde cruditate
 thermas infici posse, malignam deinde ope-
 rationem edituras? Non sanè dubito fore,
 ut quilibet, qui naturam frigoris atque calo-
 ris perspexerit, ac citra præconceptam opi-
 nionem, candidam pro veritate sententiam
 ferre voluerit, facile confessurus sit, quòd di-
 cto modo impuritas conciliari thermis va-
 leat nulla. Quòd verò nonnulli ægroto-
 rum ab usu illarum nupero pejus habuerint,
 unius forsàn causæ effectus in omnibus non
 fuit. Sed cùm lateant singularum circum-
 stantiæ curarum, rimari illas nunc diligen-
 tius non licebit. Saltem id indubitata ve-
 ritatis est, quòd unus idemque æger hoc an-
 no salutiferas sibi persentiat calidas, quas a-
 lio anno, cùm aliam humores ejus constitu-
 tionem forsàn induerint, ferre potest mini-
 mè. Præterea nonnulli diætā, & quæ eò
 D per-

pertinent, observant negligentius. Quod si postea tumultus in corpore morboſi ſuboriantur, non ſuam amant incuriam, ſed potiùs innocentem potum thermarum accuſare. Imò ſecundâ curâ duriùs paulò corpus exagitante, deſiſtunt planè ceſſantque bibere, cum tamen modo pergerent, natura tandem manus victrices efferret, meliore, deinde ſanitatìs ſtatu devoratas moleſtias eluente. De cætero ſi reverà allegatæ cruditates hoc anno nocivam procuràſſent operationem, non immeritò porrò quæritur, cur non omnes potatores aquarum malè inde habuerint? & cur illorum pars longè maxima ſe belliffimè inde valere gloriata ſit? Imò magna tum nonnulli incomparabiles thermarum vires, ob valetudinem planè reſtauratam, deprædicaverint? Ego quidem perſuaſiſſimus ſum, quòd ſententiæ illi ſemel prolata renunciare difficillimum fuerit, adeoque conquiſitis ſtudioſè argumentis forſan deſenſio apparanda ſit. Sed num, hæc contra veritatem evincere quicquam valeat, judicare deinde candidos permittemus. Saltem id ſubnecto, opinioni forſan iſti anſam dediffe, quòd de acidularum fonte referatur, ejus vires pluviſo cœlo admodum immi-

imminu
prehe
temp
ſolution
Sed qua
co hoc
dula ſu
eoque
aquas
autem
projici
pud ſen
gredi
ne, qu
ant vo
Prim
rit, ſeli
condu
ta ab ex
rendum
locorum
mora va
vel diſt
nuant
ſatis, q
rendan
receptu

imminui, atque elanguidas postmodum deprehendi. Hinc fortassè creditum est, per tempestatem aquosam, & congelationis resolutionem pari modo thermas corrumpi. Sed quanta hîc intersit differentia vel ex unico hoc notabili innotescit, quòd scilicet acidulæ sub libero cœlo blandè scaturiant, adeoque & pluviales & alias affluentes forsan, aquas recipiant, sibi que uniant: impetuosa autem calidarum scaturigo sursum omnia projiciat, atque hâc ratione nequicquam apud se retineat. Verùm ulterius nunc progrediemur fusiùs paulo dispecturi, quâ ratione, quâve methodo in usum thermæ debeant vocari.

Primò nemo Medicorum facile negaverit, feliciori calidarum operationi inultum conducere, si ventriculus & intestina liberata ab excrementis antea fuerint. Nam verendum omninò est, ne saburra forsan eò locorum delitescens ab epotis thermis commota vario modo turbas excitet, adeoque vel distrahantur aquarum vires, vel imminuantur, aut præpediantur, ut nec penetrare satis, quò velint illæ, nec egerere, quod intendant, commodè valeant. Hinc longo receptum usu est, alvum antè movere, quàm

curam auspicari. Sed sunt tamen, qui hanc prorsus damnare consuetudinem pertinaciter sustinent. Neque enim necesse, ajunt, esse, ut removeantur pharmaco ventriculi aut intestinorum retrimenta, cum thermæ abs se citra moram & liquefaciant humores, & è corpore pròtinus eliminent. Prætereà plus inde periculi pertimescendum esse, si catarcticum aliquod præmittatur, siquidem illud ex natura sua venenati quicquam in se contineat, adeoque ut corpori inimicum tumultus suscitare valeat.

Quid quod in villis forsan ventriculi aut intestinorum parietibus spinam quasi relinquens doloribus pro fluidorum alluentium constitutione nunc majoribus, nunc minoribus ansam præbere facillimè possit. Verùm facilis ad singula responsio est.

Quòd liquefaciant, egerantque humores thermæ, in confesso quidem est, sed necesse pro hoc effectu consequendo, ut majori copiâ assumantur. In minori enim, quâ solent primo die imbibi, in corpore subsistent omninò, ubi lubricam non offendent alvum.

Tùm verò anxietates præcordiorum, capitis dolores, ventris tormina, &c. sæpius solent

solent exoriri. Et comprobatur hoc experientia, imò argumentum à minori ad majus suggerit. Si enim primis diebus epotæ calidæ vel planè retinentur, vel vomitiones & molestias permultas excitant, ubi corpus antea ritè fuerit præparatum, quid non fiet, ubi id excrementorum adhuc saburrâ scatet? De periculo verò ex cathartici assumptione metuendo, item de spina forsan in intestinis relicta quæ memorantur, ad fortiora saltem & minus tuta purgantia pertinent, non ad laxantia, & quæ primas tantùm vias blandè eluant, qualia thermarum usui præmittenda adhuc opinamur. Quæ autem illa potissimùm sint, sicco transire pede consultum duco. Nam sicut inter pretiosissima quævis medicamenta thermæ reponi debent: ita nemo valetudinis suæ rationem optimè habiturus illis uti ante præsumat, quàm experti Medici consilio conformem morbo methodum utendi addidicerit. Ille autem non tantùm quæ laxantia præmitti potui, quæque alia sub illius usu & post hunc inservire queant, aperiet, sed de venæ forsan, sectione in assuetis personis aut certis quibusdam affectibus celebranda commodè admonebit.

D 3 Mirari

Mirari sanè hîc subit, perversâ tam multos consuetudine duci, ut agritudines suas depulsuri vel agyras, vetulas, tonsores, & nescio quos impostores adeant consulantque, vel his neglectis omnibus sibimetipsis consilia fingant, quasi naturam suam præ Medico calleant optimè. Et sanè inter temporalia, quibus nos beavit divina bonitas, longè maximum bonum sanitas. Et hanc concedere imperitis, & sanandi artem non doctis, aut ex proprio arbitratu, præconceptis sæpè opinionibus onerato, curam instituere, tantundem periculi affert, quantum furibus commendare thesauros suos, aut infantis arbitrio pugionem permittere. Non absimile quid agere videntur, qui illotis quasi manibus thermarum sacra intrant, neglectâ omnis præparationis, ordinis & diætæ ratione. Verùm sicut fortunæ beneficium debent, quod impunè peccare ipsis contingat: ita regulam aliis haud pariunt, quibus conscientia tenerior, & valetudinis integritas magis cordi est. Sed hæc in transitu. Ad ipsum nunc potandi actum nos accingimus.

Præparato corpore initium potationis fit
manè jejuno ventriculo. In more autem
 posi-

positum est, ex parvis cyathis argillaceis, quos ollulas vocant, *calidissimas*, ceu ex fonte profiliunt, *aquas sorbendo* assumere. [Refrigerata enim aut tepida tormina movent, nauseamque ac vomitus concitant.] Atque hoc dum agitur, *conclavi* plerumque *obambulant potatores*, externo nimirum corporis motu operationem adjuturi.

Numerum ollularum evacuandarum ad certos nonnulli cancellos quasi revocant. Scilicet cum duplici modo adhiberi thermæ soleant, internam nimirum assumptione, & externo balnei usu, hinc utrique suos fines limitesque statuere decreverunt. *Quinque* enim aut 7. dies potationi, mox totidem balneo destinantur. Atque sic bis vel ter alternatim proceditur. Neque tamen unaeademque quantitate singulis diebus bibitur. Ab imo contenditur in summum, incipiendo scilicet ab 11. circiter vel 13. ollulis donec ad 25. 30. & ultra, rarius ad 50. & plures perventum fuerit. Sunt qui figuram typis exhibuerunt, juxta quam potare conveniat. Id quod ad hodiernum propè modum accedere videtur, ubi Principum Magnatumque mensis in forma pyramidalis dapes apponi nuper consueverunt. Sci-

licet primum secundus diem, secundum
tertius, tertium quartus ollularum numero
superat; quintus verò sextusque ac septimus
propè demunt, quod illi addiderunt. Aut
si ad 5. saltem dies potationis periodus ex-
tenditur, tertius vel quartus maximum nu-
merum habet, quinto decrementum pa-
tiente. Verùm si quis rimari hanc consue-
tudinem penitiori curâ instituat, vanitatem
ejus facillimè deprehendet.

I. Enim naturarum diversitas & idiosyn-
crasix meritò sunt attendendæ. Quidam
primo secundoque die ab assumtis ex præ-
scripto ollulis parum aut nihil moventur,
ac tertio vel quarto demum die lubricitatem
alvi, aut sudoris & urinarum liberiùs pro-
fluvium persentiscunt. Quis igitur sanâ ra-
tione suaserit, ut copix calidarum bibendæ
aliquid iterum detrahatur, quarto quinto-
ve aut sequentibus diebus, cum observave-
rit, vix illas die fastigii pyramidalis [de quo
pauca modò diximus] operationem su-
am exeruisse. Ergò verendum est, ne si mi-
nor sequentibus diebus ollularum exhau-
riendarum numerus offeratur, in corpore
persistant aquæ varias certè molestias crea-
turæ. E contrario sunt, qui primo statim
die

die vix II. ollulas sorbendo evacuârunt, atque inde summoperè afficiuntur. Sic meminimus generosissimum quendam Dominum vix ad modò memoratum XI. ollularum numerum potando ascendisse, cum vices inde alvum deponeret, & mensuram urinæ plus minus egeret. Quis verò huic sua fortetitisset, ut postero die & sequentibus aliis ad figuræ legem respiciens dosin augeret? Eidem potius quanto acquievit ipse, & singulis diebus eandem operationis ubertatem, expertus est. Sed contrarii recordor in sereniss. cujusdam Principis satellite, robustæ obesitatis homine, qui primis diebus largè satis potabat, alvo tamen prorsus oclusâ & sudoribus modicè prodeuntibus. Cum verò quarta demum die 45. ollulas exhausisset, commota primùm alvus est, quæ sexies deinde fluxit, quoties ollularum numerum ad 65. extendit, cum sudore ad admirationem copiosissimo. Ex quo gemino exemplo stabilimentum sortitur nostra assertio, non ad figuræ, sed ad naturæ legem bibendum, seduloque attendendum esse, quid ipsa requirat.

Amplissimus hîc campus se aperiret inquirendi in causas idiosyncrasia; cur hic fa-

D s cilio-

cilioris, alter difficilioris alvi sit, quod etiam in vulgari purgationis actu quotidie videre est; item cur hoc præ alio corpus sudore diffluat, urinamque citius emittat? Sed cum hæc plus ingenii & temporis exposcant, quam apud me invenitur, ac præterea nemini thermas usurpantium illud penitus nosse expediat, lubens meritoque prætereo.

Potius II. hoc noto, non commodè 5. vel 7. diebus potationis periodum circumscribi. Nam cum ex dictis appareat, quod quidam vel quarto, imò quinto demum die deijcere incipiant, quid quæso, inconvenientiùs, quam tunc ab illa desistere, balneumque intrare? Cur non eam continuare ad 8. vel 9. imò 10. diem conducat, dum in fluore constitutum corpus facilem thermarum aquis transitum concedit, adeoque promptissimè egeritur, quicquid egeri ab ægroto potest optari. Nonnè meritò vereri liceat, ne maturato balnei usu [qui ordinariè alvum efficit tardiolem & constipat] sufflaminentur modò moti humores, in secunda cura postliminiò excretionem majori tumultu viriumque imminutione quærentes? id quod fieri facile advertent, qui intimiori paulò studio attendere ad omnia,

non

non gravantur, quæ potatoribus obveniant. Sed hîc mihi videor audire quosdam reclamatores; delicatulis ex sexu sequiori, nec non languidis personis, & quibus potæ thermæ nimium artus inflant, rigidum nimis fore consilium potationis in octavum vel novum protrahendæ diem. Atque his statim regero, illud à prudenti Medico temperatum iri, prout circumstantiæ requirere videbuntur. Neque enim nobis licet esse, tam felicibus, ut ad rationis præscriptum semper agere queamus cum virginibus, aut personis fortunæ indulgentioris, vel quas usque ad notabilem speciem natura formavit. His utique sponte nostrâ aliquid concedere præstat, quàm repetitæ admonitionis severitate efficere, ut consilii nostri etiam elusio placeat. Reliquis verò vel languore vel artuum tumore pressis decentissimum erit suum adire Medicum, atque ab illo agendorum ordinem porrò præstolari.

III. Illud pariter adverto, quòd iniquè à quibusdam secunda cura minori ollularum numero incipiatur. Cùm enim majori jam dosi assueta natura sit, minori certè non auscultabit. Itaque meo quidem arbitrato & experientiâ teste melius proficiunt, qui eâdem

eadem quâ defierunt in prima, secundam, ordiuntur absolvuntque bibendi periodum. Nam sicut prioris eventu iudicium constat, quid perferant vires, & quantum aquæ ad ciendam ritè operationem sufficiat: ita inutile prorsus fuerit, meticuloso quasi pede ad minorem portionem regredi, posterisque demum diebus ad summum denuò eniti.

Sed hîc non immeritò quæritur, an desistendum à potatione sit, si primo vel secundo die per vomitum rejiciantur aquæ? Respond. minimè. Melius enim in sequenti cura se ægri plerumque habent. E contrario quæritur, quid fieri expediat, si exitum epotæ satis largiter aquæ inveniant nullum? procul dubio, si vulgi consilium sequi quis velit, confugiendum erit ad sal à thermis nominatum, quod in pharmacopolio venale prostat. Hoc enim in illa calida dissolutum si bibatur, dejectiunculas plerumque solet promovere. Verùm sicut causa non una forsàn occurrit, cur in corpore subsistant aquæ: ita dictum illud sal adæquatum non observatur remedium pro illarum à quacunque causa retentarum expulsi-
one. Sæpenumerò enim [ut alias nunc causas silentio involvam] fibræ intestino-
rum

norum motrices spasmodicè afficiuntur, si-
cut in hysteris, hypochondriacis, & calcu-
lo obnoxiiis non semel factum memini.
Tum verò tantum abest, ut à sale isthoc ex-
cretio procuretur, ut potiùs clausa pertina-
ciùs inde alvus videatur. Hinc experti
Medici sententia audienda est, qui præmissâ
causâ investigatione, cur exitum aquæ non
inveniant, aptum facillè medicamentum pro
illius ablatione reperiet præscribetque.

Primo quidem aut secundo die, utpote in
minori quantitate haustæ, si resistent aquæ
in corpore, nihil periculi inferunt; tertio
tamen die, nisi sponte suâ exeant, conveni-
enti remedio propellendæ.

De cætero usitatum est universæ demum
curationi, exhibitò quòdam purgante colo-
phonem imponere. Quod purgandi con-
siliium tantò quidem minus improbandum,
quanto magis necessarium videtur. Sal-
tem de tempore, quo propinari debeat ca-
ræcticum, aliquod dubium suboritur.
Cum enim reliquiis aquarum exterminan-
tis destinetur, cur non statim finitâ curâ
potationis postremâ, antequam balnei usus
succedat, illud exhibere conveniat? enim
verò vel nocere queunt relictæ diutius in
cor-

corpore aquæ, vel non nocere. Si prius, cur velimus tantam ipsis moram concedere, donec 5. vel 7. aut plures dies pro balneo interveniant? si posterius, cur prorsus haud abstinemus à purgante? Verùm sicut experientia fide constat, quòd qui neglecto purgandi consilio abeunt, ut plurimum morbi di sint, vel post 10. aut plures dies diarrhæa corripiantur: ita facile elucescit, quòd qui valetudinis suæ commodo invigilare studeat, catartici usum refugere haud debeat. Et meo quidem suàsù post singulos potationis ambitus tale quid assumi expediet, imprimis si illi longius, in nonum scilicet diem producantur. Optimè enim liberatis sic primis viis ab omni aquarum residuo tutissimè ad balneum transgressus sit, quo quicquid illarum in corporis habitu hæret blandà celeritate extrahatur. Sed hîc paucissimis juvabit meminisse curæ ab absentibus quibusdam Medicis figuratæ, & ituris ad Carolinas traditæ. Scilicet cathartico satis valido auspicari, eodemque tali finire illam præcipiunt. Quinquè etiam vel septem dies definiunt pro sorbitionum, totidemque pro balneorum curis. Singulis diebus, elapsâ post potationem horâ unâ,

me-

medicamentum stomachicum, v. g. El. propr. Par. vel El. Oli Myns. aut simile jubent assumere. Roborationi enim ventriculi hoc deberi putant ab aquis nimium extensi. Deinde balneo usuros circa hepatis renumque regionem inungi curant quibusdam unguentis v. g. infrigid. Galeni, fantalino, rosarum, de alabastro &c. ne scilicet hepar forsitan calidiùs obtinentes, aut nimia renum calore pressi damnum, vel æstus, inò inflammationem contrahant, si liberè calidam alluere, & se insinuare permittant. Internè etiam Rosar. papav. rh. bellidis, rosarum, similesque spiritus exhibent, ut scilicet æstuanti ex balneo sanguini maturè prospiciatur. Verùm quàm inutili labore tale consilium consistat, penitiùs intuenti facilè patebit. [1.] enim non valido purgante, sed laxante tantummodò curam ordiri expedit ceu paulò antè constitit. Sed alio longè medicamento opus est cum colophonem curæ volumus imponere. Tùm enim purgationibus crebrioribus assueta quasi naturà minori catartici dosi non solet auscultare. Itaque fortiori paulò stimulo agendum, ut quicquid viscidarum fortè sordium aquarum copioso præ-

præterfluxu emollitum est, majori quasi conatu evellatur. Atque huc multum conferre è mineralium prosapia petita medicamina cum aliis commixta, plus simplici vice experientia comprobavit. [2.] Quod neque 5. neque 7. dies possint ante definiri pro sorbitionis cura, quàm quis potando vel citiorem vel tardiore aquarum transitum perceperit, paulò post dicetur fusiùs. [3.] Medicamenta stomachica post potationis actum frustraneo studio porriguntur, aquis tunc è ventriculo nondum omnibus elapsis. Cogitet enim quis secum paulò accuratius, an robur quoddam ventriculo possit afflari, aut tonus ipsius ad firmitudinem reduci, cum medicinæ particulæ copioso aquosarum interventu divelluntur, adeoque vires quoque nisi pereant planè, tamen plurimum vel immutantur vel diminuuntur. Adhæc extensio ventriculi tanta non fit, ut tono ipsius vis inde inferatur. Quid quòd & ipsa thermalis aqua egregiâ virtute polleat, robur potiùs eidem conciliandi, atque debilitatem auferendi. Sic novimus prostantque exempla non pauca illorum, qui stomachi imbecillitate diu conflictantes salutarì thermarum potu ad sententiam

con-

convaluere. Ut adco plus auxilii sperandum sit ab his aquis ventriculi parietes ubique alluentibus, quam à pauculis medicamento guttis vix unum alterumve ejus loculum attingentibus. [4.] Ante balnei ingressum dum renum hepatisque regio inungi jubetur, mirari subit, cur non unversum corpus unguentis infici præcipiatur? eò enim consiliò nititur inunctionis labor omnis, ut scilicet præcaveatur, ne calidarum vis partibus æstum nimium aut inflammationem inducat. At verò partes omnes carnosæ aptæ sunt natæ, ut inflammationem valeant concipere, adeoq; meritò inungenda pariter essent. Verùm si errorem hunc revocare ad originem suam liceat, de facili apparet, duplici modo illum esse progenitum: Sc. (1.) ex decantata olim, nunc verò explorata, inæquali stomachi frigida, hepatisque calida intemperie. Sic enim antiqui, dum thermarū ope ventriculo intenderunt prodesse, veriti ne calor hepatis augeretur, hoc refrigerante quâdam pinguedine, quasi loricâ, voluerunt induere ac præmunire. Atque hos adhuc hodie sequuntur, qui expertes naturæ thermalis ex scriptis veterum Thermologicis saltem sapiunt, rationem.

E

con-

consilii sui quod ægrotis suggerunt, susque
dequè habentes. [2.] Etiam ex eo qui-
dam videntur hallucinari, quod Töplizen-
ses thermas cum Carolinis confundant.
Cum enim in libello Töplicensium descri-
ptionem continente viderint suaderi, ut an-
te balnei ingressum hepatis renumque regio
inungatur, idem in Carolinarum usu neces-
sarium esse duxerunt. Verum qui utrisque
oculis usurpavit, procul dubio differentiam
intercedere advertet. Nam Töplicensibus
aquis, sicut æstuentes scaturiunt, inside-
tur, adeoque universum illæ corpus insigni-
ter excalfaciunt, ut inde sitis intensa, oris, a-
riditas & languor plerumque sequatur. Ca-
rolinæ è contrario ad balneum inservituræ
per 12. horas refrigerationi exponuntur, ut
ferè teporem, aut blandissimum modò calo-
ris gradum retineant. Ut igitur ab illis per
actualement fervorem dicta symptomata pro-
duci novimus: ita similia ab his excitari
non faciliè observatur, nisi ordinarium bal-
nei calorem quis auxerit, admittendo nimi-
rum majori copiâ allabentem ex fervida sca-
turigine aquam. Quantâ igitur vanitate
laboret operosa nonnullorum sedulitas, quâ
ejusmodi thermis utendi methodum ægro-
tis

tis suis prolixâ instructione præscribunt, cui-
vis liberè & citrà præconceptam opinio-
nem judicandum relinquimus. Nos mit-
tendo similes ineptias nunc alia de balneo
subnectemus.

Invaluit mos apud plerosque, ut totidem
dies balneo se committant, quot biberunt.
Sed illius consuetudinis me approbatorem
dare non sustineo. Neque enim omnibus
morbis una eademque curandi methodus
inservit. Quidam ita sunt comparati, ut
potationem cum emolumento admittant,
balneum pessimè ferant. Sic hæmopty-
cum novi, qui satis bellè à potu thermarum
habebat, per balnei verò usum languebat ad-
eò, ut vix quadrantem horæ in illo perdura-
re posset. Quidam verò potationem bre-
viorem, balneum frequentius videntur re-
quirere, quale quid in iis, qui partium con-
tracturis torquentur, quotidie observatur.
Quod itaque jam sæpiùs monui fideliter, ut
ad Medici jussum peragantur omnia, id pa-
riter & hoc loco repetere necesse est. Ille
enim consultus non tantùm definiet, utrum
plures pro potatione, an pro balneo, & quot
dies impendendi? Sed utrum matutinis ho-
ris solum, an verò pomeridianis quoque

balneum ingredi, & quamdiu in illo commorari conveniat, pro morbi & circumstantiarum ratione statuet. Neque enim indiscriminatim valere potest figura illa pyramidalis, de qua supra retuli, & quam depictam alicubi reperire est tali schemate:

II.

I $\frac{1}{2}$.

I $\frac{1}{2}$.

I.

I.

ita scilicet, ut primo die, manè & à meridie singulis vicibus hora una in balneo consumatur, secundo una & dimidiata, tertio duæ, quarto una cum dimidio, & quinto demum una. Nam affectuum curandorum conditio figuræ sæpius impatiens est, & se juvandi normam in plana potius linea reperit, quàm in pyramide, i.e. plus auxilii interdum quis percipit, si pari morâ singulis diebus balneum adhibeat, quàm si in dies variando minùs diu nunc, nunc magis, atque iterum, minùs, in illo permaneat.

Quæ de cætero de urceis balnearibus, de ollulis vesperâ ante primam potationem frigidâ replendis, & per noctem ita relinquendis, de modo excipiendi aquas è fonte cum urceis, hosque studiosè obturandis, it. de bal-

balneariorum mundificatione, calidarum immiffione harumque fufficienti non nimia refrigeratione &c. &c. memorare alia confueverunt, afferre huc & pertrahere lubens fuperfedeo. Quemlibet enim adventorum vel hofpes ejus, vel domeftici, de his atque fimilibus rogati fatis poterunt inftituere.

De balneo tantum quatuor adhuc monenda arbitror (I.) quod calor ejus nimius cane pejus & angue fugiendus fit. In mentem venit exemplum foeminae cujusdam 50. annos natae, quae molefto perpetuoque frigore cruris dextri & brachii finiftri diu multumque vexata, tandem ad Carolinarum facram anchoram confugere inftituit. Aggreditur rem ex confilio Medici ordinarii percelebris, & potationis cura ad votum abfoluta ad balnei ufum properat. Quamvis vero fideliffime admonita fuerit, ut a calore nimio fibi caveret, parum tamen vel plane non obtemperavit. Advertens enim ingreffa balneum, hujus moderatiffimum effe calorem, & ad frigoris confinium inclinare, ftatim tubulo, per quem aqua infertur, obturamentum extrahit.

Hinc fe demittit in aquam ad collum us-

que, & jugi calidæ affluxu plus satis tandem
 incalescit. Horam tamen sibi pro prima
 vice præscriptam in balneo perdurat; hinc
 egrediens sitim & languorem percipit. Po-
 stero mane somno paululum resecta pridia-
 nâ methodo insistit. Sed vix horæ qua-
 drantem consumpsit, cùm pulsare cor fre-
 quentiùs, oculis tenebræ offundi, membris-
 que omnibus vires deficere incipiunt.
 Hinc delata in lectum tam gravibus hypo-
 thymiis corripitur, ut animam vix in unicam
 horam propagare posse adstantibus videre-
 tur. Sequenti die advocatus Medicus ar-
 dente febre prehensam pronunciat. Hinc
 conducto mox currui imposita domum de-
 ducitur, ubi per 4. septimanas gravissimè de-
 cubuit, delirium, hæmorrhagiam narium,
 diarrhæam passa, donec à critica pustularum
 rubrarum eruptione tandem lentâ emenda-
 tione valetudinem recuperavit. Hæc itaque
 vestigia quemlibet poterunt terrere, atque
 ut præscribenti Doctori morem gerat, me-
 ritò impellere. [2.] Cùm de balneo no-
 tum sit, quòd obstructions in aliquibus so-
 leat parere, de tollenda aut præcavenda ist-
 hac alvi difficultate haud immeritò quæri-
 tur. Nolo autem hîc tædiosò memoratu
 fusiùs

fufius referre, quæ in remedii vicem ab aliis
suggeruntur, e. g. quando forbitiones ex
thermarum aqua paratas, aut pruna cocta
in paſtus principio comedenda, vel paſſulas
Corinthiacas ex acidularum infuſione e-
mollitas &c. commendant. Saltem hoc
aſſeverare ſuſtineo, quòd inter quampluri-
ma pro apertione alvi conſervanda medi-
camenta uſurpata, non aliud magis intenti-
oni fecerit fatiſ, quàm hauſtus largior aci-
dularum ante balnei ingreſſum ſenſim aſ-
ſumtus. Sint autem acidulæ Egranæ, ſi ha-
beri queant: Sin minus, ſuccenturiatæ fagi-
næ ex vicinia celebres. Fidem aſſerto no-
ſtro conciliabit experientia, quâ conſtat,
blandius quicquam ad alvum apertam in-
officio retinendam non temerè reperiri, for-
ſan quòd acidulæ cum thermis ejusdem ſint
proſapiæ, nimirum mineraliſ. [3.] Illud
quoque de balneo annotationem videtur
mereri, quòd non tutò ſatiſ eò die adhibea-
tur, quò potatum eſt. Cùm enim duplici
hoc modo corpus uno eodemque die fatiga-
tum viribus notabiliter deficere obſerve-
mus, cur niſi omni & ſtudio languorem
procurare velimus? Sunt quidem, qui ap-
primè ſibi placent, hanc thermis utendi me-

thodum vel elegisse vel suasisse. Ita enim temporis compendium se putant invenisse, curâ omni 14. dierum spatio absolvendâ. Prætereâ valetudini se hâc ratione optimè, ajunt, prospicere, dum quicquid à matutina potatione defluerit in corporis habitum, blandè statim sic eliciatur. Ut taceam, quòd longè meliùs hâc utriusque curæ conjunctione se valere asserant, quàm si alternatim vel biberent, vel balneo uterentur. Verùm ut ab ultimo ad primum relabar punctum: dulci profectò persuasione, & fictâ apud animum utilitate nititur hâc melioris status fiducia. Vidi permultos, inde valdiùs debilitatos, atque inter eos maximè sacerdotem, cui tantâ quotidie virium jacturâ constabat hâc methodus, ut in ministerium sustinendi corporis vix pedes sufficerent. Nichilominùs non audebat mutare consilium, aviditate faucium, siti, sudore & languore egregiè pressus. Alterum punctum veritatis umbrâ videtur laborare. Neque enim quicquid aquarum in artus se insinuavit, tantùm balneo redditur, sed & plus simul effundi indicat subsequens languor cum siti & salivæ spinosa visciditate. Ecquis verò minori lucro inhians illud firmiter tenere gestiat,

si non

si non assequi, nisi majoris dispendio queat?
id quod tandem tertio loco de temporis
compendio quoque intelligendum. Quam-
vis enim citius ad finem sic perducatur cura;
quia tamen in sanitatis emolumentum ita
non cedit, nemo facile tam sibi malè cupiet,
quin seponere diutius paulò, seu per aliquot
dies, sua malit negotia, quàm tempori qui-
dem parcere, sed valetudini nocere. (4.)
Dum de balneo quæritur, num illo citra
præviampotationem utiliceat? limitatâ vi-
detur affirmatione respondendum. Ni-
mirum (1.) non nisi perpurgato antea cor-
pore, (2.) nec nimis profundè ultra um-
bilicum balneum ingredi, nec (3.) ultra
horam in eo commorari decet. Rationem
rogatus Medicus de facili reddet. Illi au-
tem, qui pedum infirmitati per balneum stu-
dent consulere, hos solos tantum, non cor-
pus universum quotidie immergant. Quid
enim opus fuerit, hoc per trium vel quatuor
septimanarum curam singulis diebus balneo
committere, & nocivâ diligentia languo-
rem, sitim, aliaque symptomata sibi accer-
sere? Quæ de reliquo hîc dici de stillicidiò
thymarum membro cuidam morbofo ap-
plicando, dici poterant, studio premo, cum

circumspectione illud indigeat; hinc nemini auctor sum, ut proprio ductu hanc sibi medelam adhibere præsumat, sed Medici potius dispositioni ut in aliis, ita quoque hinc pareat. Nunc verò de Diætâ paululùm circumspicere ex re erit. Neque enim sufficit ritè de-
fungi curâ cum in potatione, tum in balneo, nisi cætera quoque consonent, atque, ut debent, administrentur. Solet quidem sed falsò, cibi potusque ordinatio diætæ nomine communiter efferri. Verùm cum plura eò petineant omninò, circa summa illorum capita tantummodò quædam attingemus, reliqua Medici prudentiæ permissuri.

I.) Malè agunt, qui inter potandum libero se exponunt aëri, aut pectore pedibusque nudi incedunt, vel vesperi exspatiantes, vel usque in noctem in prato hærent. Nec benè tamen faciunt, qui aëre licet æstuante, in conclavi calefacto potationem instituunt. Sicuti enim illud sudore profluente, aut nocturnâ refrigeratione uri quàm maximè obest: ita hoc nimix sudationi & languoribus potest ansam præbere. Clausis itaque fenestris & benè munito corpore præstat bibere, nec conclavi quidem calefacto, nisi frigidior forsan tempestas hoc suaserit.

2.) Quòd

2.) Quòd ad cibum potumque attinet, in genere notandum, quòd eo præprimis spectet, cum statutum tempus, tum electio & temperantia. Temporis scilicet talis ratio ineatur, ut tres vel ad minimum duæ cum dimidiata horæ inter potationē consummatam & prandium intercedant. Diebus autem balnei maturandum est prandium, quod parcius sit, cœna [liberalior] protrahenda, ut 8. horas à se invicem distent, quinta verò à prandio balneum repeti queat, si nimirum bis in die id usurpari consultum fuerit. Cibi sunt tales eligendi, qui ventriculi digestioni faciliè parent & salubritatis notâ commendantur, quales animalium carnes, hædina, vitulina, ovina, bubula junior probè cocta, gallinarum, gallorum Indicorum, caponum, ferinæ & avium varii generis, phasianorum, perdicum, gallinarum, corylorum &c. ex piscibus lucii, truttæ, funduli, perçæ, choraces, mulli s. barbones &c. & quæ ad pulmentaria sunt referenda, torrefacta pruna, cerasa, poma Borsdorffiana &c. Vitare autem omninò convenit, quæ vel stomacho negotium facessunt, vel faciliè corrumpuntur, quales sunt carnes fumo indurata, muriâ vel aceto condita, suilla,

la, urogallorum, palumborum, anatum &c. ex piscibus cyprini, alburni, rubelli; ex pulmentis flatulenta, butyro frixa, lacticina & fructus horæi. Recensitis & similibus pro suo coqui ingenio diversa solent condimenta addere, ut inde magnam exsurgere videamus in magnatum mensis eduliorum varietatem. Hæc verò ut jueundissimo sapore palato sæpius arridet: ita valetudini non itidem illam prodesse cùm ratio, tùm experientia persuadet. Quid enim, quæso, terræ tubera & fungi porosi laudabilis præbebunt nutrimenti? & inter summas tamen gulæ delicias numerantur, ut vix arto creas sapidiùs judicetur, quàm cum talibus confectum. Ita cum aceto, cum succo citri, vel limonum, cum sardinis, cæpis, allio, capparibus & similibus, cùm dulcia, tùm, piguia, nec non aromata varia affectato artificio permiscentur, ut peregrinus aut incognitus antea sapor palatum suaviùs afficiat. Non verò itidem hæc talia indifferenter omnibus conducunt. Cùm enim motionibus fermentativis, flatulentisque hypochondriorum distensionibus ansam valeant præbere, non pauci exinde multò pessimè habent. At verò nullo modo assumptæ cibo-

rum

rum & condimentorum varietati, sed inson-
ti potius thermarum potui imputare, & huic
omninò, non illis dicam scribere malunt.
Meas igitur sententiâ prudentissimum illo-
rum institutum est, qui victu simpliciore,
contenti multas ciborum mixturas averfan-
tur, valetudini magis, quàm palato consul-
turi. Et sicut sapientiæ fundamenta Xeno-
phanes olim pronuntiavit continentiam &
temperantiam: ita has ad sanitatis thermarum
ope restituendæ negotium jure merito
pertrahere & applicare licebit. Scilicet qui
ad regulam vivunt Medici, & temperantiæ
in ciborum assumptione student, columnas
quasi parant, quibus superstrui & sustineri
valetudinis suæ ædificium possit. Sed ab
hac destinatione longissimè jacent, qui
thermalis curæ impliciti ingluviem sectan-
tur, & ciborum non modò, sed vini quoque
intemperantissimi quotidianæ temulentia
operam navant. Hi cum fera aliquando
pœnitentia didicerint, non eadem sanitati,
quæ voluptati esse jucunda & utilia, non ad-
mirabuntur, si fractis ante senectam viribus,
se ipsos salutis suæ prodigos fateri cogentur.
Sed quid juvat odiosæ rei immorari diuti-
us? de potu potius eligendo quædam adde-
re

re præstabit. Sit verò cerevisia optimè defecata, non turbida, aut recens à coctura, nec ab acore corrupta. Talem enim varia procreare incommoda plus simplici experientiâ comprobatum est. Hinc cujusvis potatoris curæ esto, innocuo sibi potu, undecunque liceat prospicere. Neque tamen eò referendum videtur cerevisiæ genus, quod *Weißbier* vocant. Cùm enim fecum non expers, ad claritudinem tantum non raro perveniat, ac præterea ex tritici adjectione paretur, viscositatem in gula & palato relinquat, ventriculi sæpe inflationem in, non asuetis excitet, ac sitim parcè admodum restinguat, nisi augeat, non sanè video cur ejus usum balnei curæ addictis commendare sustineamus.

Vinum denique pro ordinario potu concedere, nisi qui ipsi jam diu assueverunt, inconsultum erit. Sed haustum unum vel alterum in quovis pastu non oberit iis assumere, qui alioquin id sibi conducere nōrunt. Sub balnei tamen usu parcius, quàm potationum diebus licebit adhibere.

3.) Diætæ portionem constituit justa somni vigiliarumque usurpatio. Ex quo capite huc pertinere videtur, quòd ultra 7. vel 8. ho-

8. horas longè protrahere somnum nihil ne-
 cesse sit. Itaque si inter nonam & decimam
 vespertinam lectus petatur, ante vel circa
 sextam postero mane auspicari curam de-
 nuò licebit. Qui verò somnum planè nul-
 lum capere queunt, hos meritò ad Doctoris
 sui consilium remitto. Nam causa ejus rei
 ut variare, ita varium quoque remedium
 ad sui ablationem requirere potest. Saltem
 de illis paucula adjicere placet, quos à meri-
 diè inexorabilis dormiendi necessitas ur-
 get. Hi etiam si conatu omni somnum atmo-
 liri contendant, vel ambulatiunculis, vel lusu
 propensionem hanc elusuri; tamen illo vel
 ambulantes, vel sedentes quasiprehendun-
 tur. Hinc sæpè quæritur, utrum expediat,
 quieti huic indulgere, an verò modo quo-
 vis resistere? Si antiquorum hîc velimus
 dogmata audire, permultas à tali somno æ-
 gritudines provenire comperiemur, cathar-
 rhos, capitis gravitatem, splenis obstructio-
 nes, pigritiam membrorum omnium, imò
 febres è longinquo quasi subnascentes. At-
 que si propriùs interrogare illos institua-
 mus, qui thermarum potatores eorumque
 accidentia observârunt, nocere utique so-
 mnum à prandio constabit. Nam non tan-
 tum

tum referent capitis artuumque lassitudinem inde progigni, sed operationem quoque matutinæ potationis tardius aliquando se exerentem sufflaminari, unde diversorum malorum causa procudatur. Verum, cum recentiorum doctrinâ innotuerit, somni tempore non tantum digestiones alimentorum promoveri, spiritusque refici, ac novâ quasi elasticitate [ut loquuntur] indui, non facile apparet, cur morosos nimium nos velimus exhibere, & sub vitæ quasi periculo absque discrimine somnum omnem interdicere. Id equidem lubens largior, præstare, si quis vigilare integrum diem valeat; si verò tantâ vi ingruat somnolentia, ut nequeat evitari, tum (1.) non ultra semihoram vel 3. quadrantes horæ, (2.) erecto corpore in sella potius, quàm in lecto, non compresso ventriculo per incurvationem & decubitum faciei in mensam somnus capiatur. (3.) Motio deinde temperata instituitur. Hæc enim ratione nec operatio tam facile retardabitur, nec capitis adeò metuenda gravitas. Quod si autem ad duas tresve horas, & quidem inclinato in mensam capite quis dormiverit, atque dein sedendo tempus omne in seram usque

usque vesperam consumpserit, tum & operationi quasi obex ponitur, & memorata superius incommoda plerumque oboriuntur, ceu rei huic attentum quemlibet docere experientia potest.

4tò.) Locò ad diætam quoque spectat motus & quietis observatio, cuius cum modò mentio facta sit, leviori saltem pede nunc tangenda est. Scilicet in ipso potationis actu lenem obambulationem, & illo absoluto motionem corporis moderatam conducere, superius jam dictum est. Nec aliud in finem hæc præcipitur, quàm ut felicius sic aquarum expeditio adjuvetur. Hòc verò scopò excidunt, qui continuà ad lusum sessione à prandio in cœnam usque occupati sunt. Et eos non semel conquerentes audiui, atque servile societati hæc in re placendi studium detestantes. Contrario autem modo peccant, qui motu nimio corpus exercent, & saltatione vix ac ne vix quidem interruptâ, tres vel quatuor horas delectantur, dicam an fatigantur. Quo fit, ut liberalius sudorem pori emittant, sed noctis refrigeratione post saltationem plerumque in prato peractam subitò claudantur, indusio prorsus madido horripilationem excitante.

F

Quem-

Quemadmodum igitur moderatus non nimius corporis motus rectè thermis ufuros decet. Ita

5.) Diatæ membrum, animi scilicet temperamentum, æquali semper lance debet conservari. Exulet itaque ira, affectus maximè implacidus & turbulentus: exulet terror [modò in potestate nostra sit] adeò sub hac cura perniciosus, ut exempli meminerim in Serenissima Virgine Ducali per improvisi incendii famam tantoperè terrefacta, ut in syncopen inciderit vix horæ spatium finitam. Exulet quoque tristitia nonnunquam cum inquietudine & perturbatione, interdum cum jugi corporis quiete conjuncta. Maximè tamen Veneris vitanda sunt litamina, quòd sub thermarum cura versantes virium inde consumptionem magis quàm alio tempore persentiscant. Sic novi exemplum Viri cujusdam 36. annos nati, qui simile peccatum vertigine, titubatione, lateris sinistri gravitate summâ, imò imminenti apoplexiæ metu luebat, quodque vix ac ne vix quidem generosiorum medicaminum usu expiare poterat, curâ thermali ad illum annum penitus rescissâ. Ut ad eò sit

Felix.

*Felix, quem faciunt aliena pericula
cautum.*

Tandem quæ 6.) loco circa excernendorum & retinendorum caput hîc afferri deberent, tacta jam sparsim in superioribus sunt, ut repetere illa supervacaneum videatur. Quæ enim ad alvum in officio retinendam pertineant *pag. 51. 75.* indigitata; quæ sanguinem, sudores, urinam, menses &c. p. n. fluentes spectant, meritò penitiori Medici inquisitioni & auxilio relinquimus.

Nunc verò quid & quò potissimum modo agant assumptæ in corpus thermarum aquæ, brevi consideratione expendi meretur. Est sanè loquax illarum virtus, nec ostendit se saltem, sed ingerit. Nota hinc in vulgus est & celebratâ illarum vis, quâ non tantum solent alvum ducere, sed & lotium propellere, ac sudoris sæpius copiosi profluvium in quibusdam quoque subjectis salivationem excitare. Et hæc omnia simul intratrium circiter horarum spatium tam blandâ benignitate peraguntur, ut cessante operatione plerique potatorum vel exspatiari, vel quicquid aliàs velint pro lubitu efficere valeant. Ecquis verò celebratissimo unquam remedio tale quid præstitit? quis non

novit, quam deteri vires soleant ab unico
saltem catarctico insolentiùs paululùm se
exhibente? quis non sentiat, à sudore paulò
copiosiore languorem induci? Hic verò
dum eòdem quasi momento utrâque viâ, i-
mò per urinam quoque plurimum egeritur;
dum aliquot dies ita semper continuatur,
notabile adeò virium detrimentum planè
non percipitur. Quædam tamen pro sub-
jectorum conditione differentia in operati-
one deprehenditur, cùm alii citiùs, tardiùs
alii moveantur: quibusdam alvus liberiùs
fluat, sudor & urina minùs: quibusdam ve-
rò hæc & ille copiosiùs exeat, alvò interim
parciùs se exonerante. Ita scilicet hæc for-
san eveniunt, prout nimirum unius præ alte-
ro natura magis sensilis ac prompta, humo-
resque ad motum procliviores existunt.
Quamvis verò determinatu perdifficile, nisi
impossibile sit, universæ operationis scenam
aperire, & pressius dicere, quâ ratione effe-
ctus modò recensiti ab aquis epotis produ-
cantur, liceat tamen pro ingenii tenuitate,
tentare ac paucula tantùm afferre, ut habe-
ant alii, in quo cogitationum aciem defi-
gant, & intricatum negotium subtiliori
scrutinio pervestigent.

Quod

Quod Hippocratis effato venditatur, totum omninò corpus esse perspirabile, id ad rem præsentem quadrare quàm optimè videtur. Quamprimùm enim forbillando demittuntur calidæ, partim in transitu per gulam, partim in ventriculo subtilissimam vim suam instar fumantis auræ quaquaversum diffundunt. Hæc verò molliissimo quamvis appulsu, totum genus nervosum, ejusque minimas fibrillas, cujuscunque partis corporeæ texturam interposito parvarum glandularum efficientes attingit. Hinc paulatim illæ in levissimas contractiunculas adactæ per vascula glandularum excretoria lympham ejicere annituntur. Intenditur verò & promovetur hic motus, postquam continuatâ potatione non tantùm ventriculus & intestina aquis replentur, sed hæc per pressionis quendam modum in anfractuosos lactearum poros, & porrò per vias chyli consuetas in ipsum cor impelluntur. Tum enim sanguini consociatæ illum quasi fundunt, minutiùs nimirum discerpendo atque in teneriores moleculas divellendo; hinc cum ipso arteriarum ope tum ad extrema, tum ad intima corporis perveniunt. Sic glandulas cutaneas successivâ copiâ allu-

unt, & irritationem earundem ac motum, excretorium compressione promovendo, partes primò tumidiore, mox sudore madidissimas reddunt. Interiùs verò inde turgescuntibus non modò glanduloso pancreaticis racemo, sed & intestinorum gyro, in hujus canalis cavum ingens lymphæ vis exstillat, quæ intermixto bilis sale volatili oleoso, quicquid vel sordium vel mucì offendit, sub excrementorum facie, per guttur inferius fecum simul educit. Sic renes pariter lotium egerunt abundantius, non tantùm quia magna thermalis aquæ potio hausta ex intestinis statim per vias adhuc dum ignoratas ad illos transfertur; sed quoniam copiosior quoque feri pars ad ipsos deponitur, massâ scilicet sanguinis ad aliqualem quasi fusionis seu colliquationis gradum deductâ & celerius in circulum actâ. Hæc verò omnia tamdiu solent durare, quamdiu aquas quaquaversum, intimis corporis partibus impulsas à tergo semper novæ sequuntur. Cessante autem potationis actu haud mora ad subsidentiam sanguis redigitur, glandulæ omnes detumescunt, & excretiones singulæ paulatim emanent. Extraordinariè autem in quibusdam personis aliqua operationis vis

vis ad seram usque vesperam, imò ad noctem ipsam postliminiò resurgit, cujus rei causam ex individuorum conditione petendam impossibile foret hîc enucleare. Saltem dicta in compendium trahendo asserere licet, modo duplici thermas agere, partim scilicet in genus nervosum animali fluidum perfusum, elastico quasi stimulo illud afficiendo: partim in sanguinem s. fluidum vitale, hoc nimirum quasi fundendo, sive ad majorem molecularum suarum discontinuationem, ut vocant, adigendo. Illud evidenti effectû demonstrat plerorumq; potorum sub exordio potationis statim facta in extremis partibus perceptio quædam quam fornicationis alii; alii blandæ punctiunculæ quodam sensu efferunt: hoc humidâ quâdam inflatione comprobatur, quâ turgidulus universi corporis habitus deprehenditur. Ita scilicet à posteriori & ab effectu thermalis aquæ natura nobis paululùm innotescit. Quâ verò ratione à priori considerata hoc vel illud efficiat, ignorabilius obscuriusque nobis est, principia constitutiva, ut vocant, earum & modum mixtionis omninò nescientibus. Interim ex dictis collectu facile est, quod præter tres istas car-

dinales virtutes, alvum nimirum, sudores & urinam provocandi, non tantum quaquaversum penetrandi minimorum canalium, & tubulorum obstructions referandi dyfcraſiam vitalis fluidi, & per conſequens quoque animalis emendandi; ſed & uſu externo diſcutiendi, abſtergendi, mundificandi, conſolidandi, & roborandi vim præcellentem thermæ obtineant. Catalogum, ita prolixum condere valerem iſtorum affectuum, quibus curandis inſervire thermarum uſus cum emolumento queat. Sed cohibeo ſtylum, ac malo, laudatrix thermarum eloquentiſſima experientia ſit. Hinc aliquot ad calcem ſcriptiunculae huius annexæ ſunt hiſtoriæ, quibus illarum ſalubritas ob oculos ponitur haud tantum, ſed & penſitandi ſimul occaſio ſuggeritur, num illæ ægritudinibus longè pluribus, quas inter & recensitas quædam intercedit affinitas, adhiberi percommode poſſint. Antè verò quàm has producam, per paucula tantum de balnei operatione adhuc ſubjicere placet.

Scilicet in quaſtionem venit, utrum ſub iſtius uſu per cutis ſpiracula introeant aquæ, corporisque fluidis connubant? an verò citra profundiorẽ ingreſſum tantummodò emul-

emulget
las in
pore el
quàm i
nonnul
hic ab
Cicero
probab
denda
quod c
malibu
quamp
fuerint
rantes
petunt
(3.) Qu
um ar
um uſu
fungun
collum
caloris
omnib
ctione
lici, q
tineat
hicelò
mul di

emulgendo quasi, & exprimendo glandulas in & sub cute contentas quicquam è corpore eliminant? Sicut verò tam hujus, quàm istius quæsitæ affirmantes rationes nonnulli afferunt: ita meritò quemvis suo hîc abundare judicio permittimus, rati, Ciceronis effato, multa esse, quæ nos fallant, probabilitate magnâ. Hæc tamen expendenda pro cujusvis placito tradimus: (1.) quòd tumida ab epotis per aliquot dies thermalibus aquis membra statim flaccescant, quamprimum vel semel aut iterum balneo fuerint immissa. (2.) Quòd scabie laborantes præparatione debitâ præmissâ per repetitum balnei inessum optimè curentur. (3.) Quod languore majori it. siti & faucium ariditate soleant prehendi, qui balneum usurpant, quàm qui sorbitionis curâ defunguntur, imprimis si vel profundiore ad collum usque immersione se demittant, vel caloris moderamen negligant. Ex quibus omnibus forsàn haud absurdâ penitus collectione fluet, per balneum potenter foràs propulsi, quicquid in aut sub cute proximè contineatur. Hinc à lymphâ, nutrimenti vehiculò, copiosius siceducta, & spiritibus simul dispersis nonnihil ac deperditis, me-

morati languoris & reliquorum symptoma-
tum origo forsitan petenda fuerit. Sed a-
liam balnei, ejusque operationis ætiologi-
am pro lubitu excogitet atque effingat, cui
hæc non arridet. Nos memores promif-
si quindenas damus historias fidem nostram
liberaturi.

Historia I.

*Mulieris varios ac desperatos planè morbos re-
fert, nauseam naturæ ab aquis Carolinis vo-
mitus ostendit, quò palulùm balnei atq; potus
frequentiori usu mitigatò, ipsa deniq; post
tertium mensem ex voto convaluit.*

ANno 1684. M. Aug. A. D. B. fœminæ
XXV. annorum, habitu corporis te-
nuiore prædita, facie subtumidâ pal-
lidâque, tensionis molestias in utroq; hypo-
chondriorū sentiebat, cum appetitu immi-
nuto, dolore occipitis, & circa os sacrum,
tantum non continuo, effluente simul per
muliebria illuvie quâdam albâ, tenui, copio-
sissimâ, & languore universi corporis partes
affligente. Cum varia diversorum Medi-
corum consilia adhibuisset incassum, tan-
dem ad Carolinarum usum applicuit ani-
mum.

mum. Itaque præmissis ritè cataractico se-
curæ accinxit. Primo die absorptis vix du-
abus ollulis calidæ nauseam ructusque passa
tandem evomuit. Mox 5. alias exhaustit, iti-
demque rejecit, ac difficili conatu 6. ollulas
postremò evacuavit, quas tamen retinere,
potuit minimè. Hinc eo desiit die, sed po-
stero mane successu bibit feliciore. Nam
neque nausea, neque vomitus rediit, utut
ructuum frequenti emissionè vexaretur.
Sic quindecim aquarum ollulas assumpsit, un-
de ter alvum deposuit, cum sudore multo &
urina aliquantulum profusiore. Tertiò die
ad 19. quarto ad 23. & 5. ad 27. ollulas ascen-
dit, unde sexies, ac tandem decies, alvus mo-
ta, sudor verò & urina liberalissimè proflu-
xerunt. Inde 7. dies balneo impendit, sin-
gulo tantùm mane horam unam usque ad
duas consumendo. Reversa postea ad po-
tationem eo ollularum numero occepit,
quo primam curam finierat. Cumque
singulis diebus sufficientissimam operatio-
nem per omnes tres vias, ut antea perci-
peret, nec dosin augere, nec plures, quàm
antea dies bibere instituit. Hinc iterum
7. dies balneo dedit, ac tertiâ vice ean-
dem cum sorbitione & balneo orbitam im-
plevit.

plevit, ita tamen ut die proximo, postquam ultimò biberat, purgationem balneo præmiserit. Toto curationis decursu tolerabilior valetudinis fuit conditio, appetitu non tantum restituto, sed doloribus quoque retrò versus paulatim crescentibus, ac languore multum imminuto. Saltem, fluor ille albus molestâ pertinaciâ perstitit, atque 6. ad 8. septimanas à peractâ cura cum periodico incremento adhuc continuavit, donec sensim post tertium mensem cessans, faciei pristinum ruborem, robur autem universo corpori relinqueret.

Tria potissimum in præsentî casu videntur notabilia: (1.) quòd optimè se gesserit ægra repetendo aquarum haustum, utut bis vomere coacta. Inde enim liberatus non nihil à muco viscido ventriculus sequentibus diebus non tantum facilius admisit, sed retinuit quoque ac transmisit aquas operationem ex voto peracturas. (2. Quòd dosin 27. ollularum, quibus ad sufficientiam vacue facta, non extenderit amplius, nec plures quinque diebus potationi indulserit. Quid enim opus majori calidæ quantitate ventriculum aggravare ac distendere, si minori scopum desideratæ purgationis liceat obtinere? Sicut nec plures potationi

oni dies destinare, expedivit, cum frequen-
tius balneum affectus conditio imperave-
rit. (3.) Quod post tres demum menses
evanuerit molesta fluxio. Hinc apparet,
abjiciendum animum non esse, si durante
curatione non statim sequatur morbi remis-
sio. Indubitata potius veritatis progno-
sticon est, quod abiturientibus plerumque
Medici solent impertire:

*Cum patriæ fines post curam videris,
instā*

Dietā sanā: Sic valetudo redit.

Cur verò hæc ita eveniant, non adeò for-
san difficilè fuerit perspicere, si quis puri-
orajam fluida corporis facta consideraverit,
quæ laudabili diætâ conservata pacatum
denuò Oeconomix animalis statum, viri-
umque robur postliminiò firmiùs promit-
tunt.

Historia II.

*Virum Paralyti obnoxium, ejusq; felicissimam
curam proponit.*

Eodem anno Junii Mense Dominus
C. A. S. Vir 32. annorum, habitu cor-
poris mediocri, sedentariæ vitæ, stu-
diorum & officii causâ assuetus, dolori
capitis & oculorum hebetudini diu obno-
xius

xius tandem vertigine, mox lateris dextri tali resolutione & refrigeratione prehensus est, ut nec brachium nec pedem movere potuerit. Intellectus tamen omninò cum sermone integer permansit. Adhibito per 2. ferè menses præstantiorum medicaminum apparatu tantum profecit in melius, ut motus affectarum partium restitueretur quidè, sensus tamen deficeret. Hinc conclavi obambulans gressuum suorum talem rationem figurabat, quasi pedibus alienis incederet. Accessit itaque Carolinarum asylum & prævio purgante curam primam exorsus ad septiduum usque extendit. Neque enim per bidduum commota alvus est, neque sudor exiit, donec tertio demum die XXVII. ollulas exhausisset, unde bis dejecit, cutisque humescere cœpit.

Hinc ad XLV. ollulas successivo adscensu pervenit, & largissimam per tres vias consuetas operationem expertus est. Inde autem in balneum se contulit, per IX. dies cum insignem ejus utilitatem perciperet, sensu partis affectæ punctiunculis quibusdam se postliminiò prodente. Curæ secundæ tum in potatione, tum in balneo,

neo, totidem quot primæ, dies tribuit, nisi quod huic unicum diem adjiceret. Quo factum est, ut sub ipsa potandi periodo sensim non tantum sensus, sed & calor partium omnium rediret, & ipse non amplius æger, sed sanus ac incolumis domum reverteretur; ubi adhuc ex DEI benignitate salvus agit.

Tria hinc iterum observatu videntur digna:

(1.) Quod optimo consilio ad septem dies sorbitionis cura fuerit extensa. Cum enim tertio demum die operatio inceperit, absurdum fuerit, quinto statim desinere, eo nimirum tempore, quo thermales aquæ vim suam visæ sunt plenius explicaturæ.

(2.) Rectè ad XLV. ollularum numerum perventum est, quod ab hoc tandem egregiè litatum. Scilicet advertere semper decet ad saturationis; quod vocant Chymici, punctum, quantum scilicet cujusvis ferat cum euphoria requiratque natura, respectu simul ad affectus curandi indolem semper habito.

(3.) Duæ saltem curæ fuerunt institutæ, ita ut 14. dies potatio, 19. verò balneum sibi vindicaverit. Id quod meo quidem arbitrato plus effecit, quam si tribus periodis curæ fuissent circumscriptæ, ceu ex discursu nostro superius innuit.

Histo-

Historia III.

Agit de ingenti ad urinam reddendam stimulo, menstruisq; intempestivè profluentibus cujusdam fœminæ, cujus & levamen post secundum curæ thermalis usum enarratur.

ANno 1685. A. R. S. staturæ procerioris, habitusque firmi fœmina quadragesimum vix supergressa annum, ingenti laborabat urinæ stimulo, ita ut hanc vix ad semihorulæ spatium continere, nec sacris proinde interesse valeret. Accedebat præterea lunaris, quod vocant, tributî quædam inordinatio, ita ut sanguis instar loturæ carniûm non tantum incerto termino, sed vel ad concitatiorem paulo corporis motum extemplo proflueret, mox verò sponte suâ iterum sisteretur. Tuebant quoque pedes, lassitudine universum simul corpus occupante. Accepto hæc thermis utendi consilio tres Mens. Augusto curas absolvit, cum balneo ad morem intercalari. Summus ollularum numerus XXXIII. fuit, unde alvus ad votum respondit haud tantum, sed præter sudorem, mediocrem urina quoque reddita est duplo

plo majori quantitate, quàm aquæ fuerunt assumptæ. Bibit autem labore summo, præcordiorum angustia sub potandi actu maximè pressa. Balnei diebus siti plurimum vexata in solatium fructuosum adhibuit cum cerevisia papaveris bellidisque tincturam minerali clyffo attemperatam. Tantum verò ex DEI omnipotentis gratia & usu thermali levamen ipsa persensit, ut post secundam curam non tantum arbitrio pareret, sed sublato in totum tumore pedum altissima montium cacumina perreptare posset. Reversa domum iustas mensium periodos, & sanguinis excretionis coloratas recuperavit, ut sanitatem juvenulæ XV. annorum meliorem non fuisse sanctè asseveraret.

Et hîc paucula brevissimè notamus: (1.) Perpetuus urinæ stimulus dubio procul seri acrimoniæ & copię originem debuit. Hinc quoque pedum tumor, mensiumque inordinatio & effluxio præceps à corporis motu poterit derivari. Cessavit verò molestus mejendi conatus, egestâ tam ingentî lotii quantitate, & seri crassi plurimum imputatâ. Sic reliqua quoque symptomata cur desierint, intimiori curâ pensitanti facile patebit. (2.) Quòd ægrota labore

G

summo

summo biberit, à flatibus forsan impetuo-
se motis, & ventriculi extensionem remo-
morantibus accidit. Sic memini satellitem
Serenissimi cujusdam Principis flatulentæ
aliàs intestinorum distensionis obnoxium,
cum quodam mane biberet, subito refrin-
geratum in dysporœam & tantum non in a-
nimi deliquium incidisse, à copiosa tamen
ructuum flatuumque exclusione confestim
restitutum. (3.) Sitim aridam esse exor-
tam non mirabitur, qui laticis aquosi sub
potationis cura per urinas exclusionem tam
largam recogitaverit. Ut taceam, quod
familiarè sit sitire balneo utentibus, maxime
si caloris gradu excedatur.

Historia IV.

*Juvenem symptomatibus variis per vices labo-
rantem, ejusq; recuperatam describit sani-
tatem.*

ANNO 1686. Mense Majo & Junio
thermarum auxilium imploravit &
obtinuit Juvenis quidam 28. anno-
rum, temperamenti satis laudabilis & ha-
bitus alioquin succipleni, sed gravioribus
animi affectibus, terrore, irâ, mœrore,
nec non vitâ sedentariâ multum immuta-
ti. Hinc capitis imbecillitate, aurium tin-
nitū,

ritu, cordis palpitatione, phlogosi, dolore
lumbari, diarrhæa, appetitu dejecto &c.
per circuitus ita laboravit, ut nunc hunc nunc
illò molesto symptomate afflictus vividum
faciei colorem perdiderit, absumptis car-
nibus flacciditatem induerit, non sine im-
minentis phthiſeos metu. At verò ritè
ordinata à thermarum cura, geminaque
potationis ad 7. & balnei ad 3. dies perio-
dò perfunctus, ita convaluit, ut postero
anno uxorem duxerit, & in hunc usque
liem incolumis superſtet quatuor libero-
rum pater. Unicum adhuc memorare li-
ceat, quòd in sorbitionis cura ad septem
lies protracta ſumma ollularum doſis 21.
uerit, unde duodecies plerumque alvus
luxit, cum ſudoribus largis & urina ſatis
copioſa. Balneo vix intereſſe 3. dies, &
nunquam per horam integram potuit; ſe-
cus enim capitis gravitas, languor & ſitis in-
valuit.

Hic plura penitiore indagatione digna ſe offe-
runt: (1.) Cauſa ægritudinis & occaſio in
ſpirituum per vehementiores animi motus
affectione (2.) cauſa abſumptæ & flaccidæ
carnis (3.) cauſa, cur in hoc ſubjecto tam
exigua aquarum doſis plus præſtiterit, quàm
in alio dupla illarum quantitas ſæpè non
G 2 ſolet

solet efficere. (4.) Causa, cur longior in balneo mora dicta symptomata procreaverit. Sed hæc plenius expendenda illis relinquo festinabundus, qui me magis otio & ingenio abundant.

Historia V.

Calculus & Podagra in sexagenario, curâ rite peractâ, profligitur.

ANNO 1687. Mense Augusto Sexagenarius quidam, G. O. obesulus, florido vultu, calculo & podagræ æt aliquot annis obnoxius, novissimè in graves sinistri lateris dolores inciderat, quos licet medicaminum usu mitigaret, tollere tamen in totum non poterat. Hinc ad Carolinarum opem confugiens curamque ritè auspiciatus primo die semel atque iterum aquas revomuit; insequenti mane retinuit atque ab epotis 17. ollulis liberale sensit urinæ profluvium, cum notabili dolorum remissione. Perrexit verò potatione in octavum diem ad XXXVII. ollulas ascendendo, quas postmodum in secunda cura pariter cum euphoria quotidie assumpsit, ne minimo quidem dolorem vestigio remanente, urina

urinâ autem copiosissimum sabulum rubrum egerente. Balneum, cui quâvis periodo 6. dies dicati, optimè tulit, pedibus inde, ut aiebat, quasi robore perfusis. Hinc agilitatem suam experturus, summitates montium perlustravit, & optimè inde valens domum repetiit, ultra annum integrum liber ab omni podagræ & calculi insultu.

Duo hîc considerationem videntur mereri:

(1.) Quòd penetrans calidæ vis sabuletum, statim attigerit, & obstructionem referando urinæ & sabuli exitum promoverit, ut inde doloris imminutio secuta sit. Unde innotescit, à quibusdam falsò nonnunquam concludi ad grandioris calculi in ureteris principio præsentiam, quando dolor fixus & diu constans in illa regione percipitur. Nam etiam à sabulo arctius impacto urinæ effluxus cohiberi, & renis parenchyma distendi potest, ut dolor inde satis atrox exsurgat. (2.) Quòd pedes balneo leviores facti strenuè suum fecerint officium, mirum non est. Nam nodi circa articulos adhuc recentes mollioresque resolvi poterant, quod in aliis subjectis ægrè aut nunquam perfectè contingit. Cæterum & calculo & podagrâ pressos allevamentum à thermarum usu recipere, vel inde probatur,

tur, quòd sæpè ad illas, tanquam ad sacram anchoram, recurrant, & exempla prosten multorum, qui vel singulis annis illas frequentare consueverint.

Historia VI.

Princeps motus spasticos in abdomine patitur, conjunctos cum aliis symptomatibus; duæ ejus purgationes, & incoluminis discessus.

ANNO 1688. Mense Majo & Junio serenissimus quidam Princeps, cùm curiosa indagazione in Mercurii naturam per ignem inquirens multum vaporis nocivi attraxisset; hinc verò partim in artubus, partim in nervoso abdominis circulo motus spasticos sub colicæ schemate sæpius pateretur, vertigine simul & cephalalgia affligente apoplexiæ metu territus, tandem ad thermas properavit. Præmissâ præparatione tres curas ad 5. dies, tam potatione, quàm balneo confecit. Primo die ter, quinto autem, semel evomuit, id quod in secunda cura die quarto pariter contingit. Hinc postero mano ventriculi mucum viscidum aquâ thermali incisum educturus blandum accepit emeticum. Et hoc insigni commo-

do usurpatū testabatur valdè copiosa materia pituitosæ rejectio, & facillima sub tertia cura aquarum retentio, vertigine reliquisque symptomatibus in totum sublatis. Quamvis verò abundantissima operatio aquam ferè limpida, ceu imbibita erat, per alvum reddiderit, ut adeò vacuefacta prorsus & eluta intestina crederentur, exhibitum tamen post finem ultimæ potationis catarcticum magnam pituitæ, quam vitream vocant, quantitatem eduxit, & quidem frustorum formâ nuces juglandes magnitudine æquantium. Balneo deinde, cum emolumento usus incolumis discessit, prosperâque in hunc diem valetudine fruens exercitûs legioni præest Dux fortissimus, quem DEUS porro gratiôsè servet ac tueatur.

Duo saltem respicere libeat: (1.) Cùm Mercurii vitio invaletudinis causa attribueretur, consilium thermas usarpandi hoc videtur fundamento innixum fuisse, quòd illæ sulphuream obtinere naturâ credantur. A sulphure verò ligari Mercurium, notum est, comprobâtque spontanea quasi amalgamatio, quando manibus ille tractatur, annulisque digitorum aureis ita se insinuat, ut inde albescant. (2.) Falsa est nonnullorum.

persuasio, curationis thermalis tempore ab omni medicamentorum usu abstinendum esse. Accidit enim interdum, ut quædam ab aquis moveantur, sed non removeantur. Medici autem est, diligenti vigilantia attendere ad omnia. Cum viderit naturam à se ipsa non posse amoliri, quod sibi molestum est, ejus se ministrum probans laboranti subveniat. Itaque in præsentī casu commoda videtur emetici propinatio. Cum enim repetitus in prima secundaque cura vomendi conatus indicium faceret, attenuatum quidem aliquo modo mucum, non tamen tam levi nisu ejiciendum, aquarum stimulo potius versus guttur inferius tendente; opus omnino hoc subsidio fuit, quod etiam laudabile levamen præstitit.

Historia VII.

Asthmatis periodici contumacia tandem immittitur.

ANNO eodem Vir honoratissimus XLVII. annorum, staturâ corporis mediocri, sed habitu satis pleno per 4. menses asthmate convulsivo s. periodico afflictus erat, præpropere sæpius insultu, dum ambularet in platea, prehensus. Nichil quidem eorum intermisit, quæ depellen-

do

lo malo conducere videbantur, sed conatu
tamen prorsus irrito, morbo scilicet inter-
dum imminuto, mox ad ingenium suum re-
deunte. Hinc vitæ per tot mala trahendæ
impatiens thermas accessit, & ordinatam ri-
tè curam geminam suscepit; sed tantum 3.
dies ad potandum, totidemque ad balneum
impendere potuit, quod 30. ollularum dosis
impetuosius paulò operaretur. Tandem
tertiâ vice potationis curam ad decem dies
citra ullum incommodum continuavit, ope-
ratione per tres vias optimâ & sudore im-
primis largissimè profluente. Balneum verò
cecu sibi adversum planè omisit. Specifico
potius purgante potandi finem prosecutus
est, unde dejectiones copiosas virides instar
intritæ ex nasturtio deprehendit. Quamvis
autem sub ipsa curatione meliusculè habe-
ret æger, non tamen emanere sensit mole-
stum hospitem, sed ex improvise sæpius ado-
rientem adhuc observavit domi redux, do-
nec aliquot septimanarum spatio paulatim
decrecendo disparuit prorsus, nec per VIII.
annos rediit unquam.

Non statim desisse hunc effectum, mirum illi
haud videbitur, qui indolem novit, & contu-
tumaciam ejus in usu præstantissimorum me-
dica-

dicaminum advertit. Sufficiet tamen hinc colligere (1.) quòd duro huic nodo thermarum cuneus valeat adaptari, & (2.) hòc aliis convulsionum affectibus auxilium ferri.

Historia VIII.

Virgo suppressione menstrui, variisq; morbis à pessima dieta ortum trahentibus egrotans, purgationum & balnei usu pristinam acquirit valetudinem.

ANno 1689. M. Aug. salutari thermarum auxilio revaluit honestissima virgo XXIII. annor. cui ultra septimum mensem fluxus jam substerant. Thermas salutavit vultu pallido, subtumidoq; cum hypochondriorum inflatione, & borborygmis, respirationis difficultate, capitis lumborumque dolore, & universi corporis lassitudine, ac torpore summo. Obstructiones has sibi conciliaverat diætâ pessimâ, delectata fumo duratis viscidisq; alimentis, nec non lactici- niis & condimentis acidis, imprimis lactucâ cum aceto, quæ sæpenumero uno eodemq; pastu comederat. Sub cura prima ad 5. tantum dies instituta, quotidie ventriculi subversionem experta est, ita quidem, ut dimidium plerumq; aquarum assumtarum [bibe-
rat

rat autem ad XXV. ollulas] vomitu rejiceret, alvô tamen quater vel quinquies motâ, sudore simul satîs copioso. Itaq; 6tô die propinatatum est emeticum, quo incredibile dictu, quantum viscosæ materiæ ipsa per vomitum exantlaverit. Hinc balneo 6. dierum indul- sit, à quo reversa ad potationem est. Hanc verò adeò commodè jam pertulit, ut ad 9. dies continuare illam potuerit, operatione, per omnes vias ad votum effusissimâ. Pur- gata deinde atque ad balneum relegata est; sed hœc vix semel atque iterum usa, cum præ- viis per horam torminibus in regione ingui- nali & circa os sacrum catamenia eruperunt. Sanguis primo die ater & crassus atque gru- mosus prodiit, tribus tamen posteris diebus floridior apparuit. Deniq; 5. adhuc dies bal- neo se cominist, jam libera ab illa infelici symptomatum memoratorum lerna. Sic re- viviscente quasi faciei colore, & redeunte, membrorum alacritate thermas reliquit, il- larum laudas perpetuò decantatura.

- (1.) Ex præsentî casu elucescit asserti nostri supe- rioris veritas, quòd medicamentorum usu na- turam adjuvare expediat. Nisi enim emetico expurgatus fuisset ventriculus, procul dubio successu caruisset cura secunda. Et hoc (2.) præterea observamus, quòd vomitionem qui- dem

dem in aliquibus thermales aquæ provocent, mucum tamen s. pituitam viscidam tenaciùs forsan stomachi rugis inhærentum, non tam educant, quàm incidunt moveantque. Id quod in excretionem per intestinorum exitum parimodo videre est. Nam in quibusdam personis etiamsi vel centies dejecerint sub potationum curis, tamen ab accepto purgante demum viscida & glutinosa excrementa deprehenduntur. (3.) In hoc casu notandum, quod mensibus fluentibus à balneo rectè abstinuerit virgo. Si verò illorum eruptio contigisset sub potationis actu, non dissuadenda hæc fuisset, cum naturæ conatum expellendi vi suâ penetrante adjuvare thermarum aquæ quàm optimè valuisse.

Historia IX.

Scorbuto sanguinisq; profluvio laborans vidua Carolinis utitur aliisq; medicamentis, quorum virtute paululum quidem levaminis percipit, domum verò reversa denuò isthac malò cruciata pleuritide tandem obit.

Miseriore ac duriore fato afflictæ fuit S. G. pannificis cujusdam vidua XXXVI. annor. ex scorbuto malè sana, quæ 18. septimanas continuo sanguinis profluvio laborans cum macie & languore totius corporis A. 1690. M. Maj. desperato de-

demum consilio, medicamentis nihil emolumentum afferentibus, in thermas se contulit. Ipsa ductu proprio curam auspicata XIII. ollulas primo die evacuavit, à quib9 duodecies purgata postero die XVII. assumpsit. Sed tanta vi egerunt, ut non tantum vicies alvum moverint, sed sanguinis fluxionem ad animi ferè deliquium intenderint. Hinc aceti odore se paululum reficiens circa vesperam ex pharmacopolio corallia rubra, & pro grosso theriacam petit. Hæc remissa cum acetato deglutit, cubitumque concedit. Nocte satis quietè transactâ, insequenti mane aliquantulum remississe fluxum advertit, à potatione tamen abstinuit. Verum cum tertio tandem die longè parcius esse profluvium conspiceret, quàm accessûs tempore in thermas, relictò animo bibere de novo incipit. Hinc 15. ollulas exhausit, à quibus quamvis totidem ferè vicibus alvus soluta, ac sudor copiosè satis protrusus sit, sanguinis tamen exclusionem haud sensit majorem. Itaque eâdem ollularum dosi in quintum usque diem continuavit. Tum verò denuò impetuosius prodire sanguinem deprehendit. Recurrit igitur ad familiare sibi coralliorum rubrorum auxilium, cujus bis repeti-

ti usus egregiè profuit. Hinc tertiâ vice post
trium dierum intervallum potare sustinet
feliciore, quàm antea, successu. Nam & alvi
moderatio fuit egestio, & sanguinis minor
longè commotio. Quartò tamen die om-
ninò desiit bibere, verita, ne quinto prioris
curæ fatum immineat. Sed eodem illo die
ad 6. horas fluor emanfit, qui tamen rever-
tens vices deinde & inducias admisit. Mu-
lier autem regressa domum in tantum deni-
que convaluit, ut perpetuo quidem effluxu
liberata, incertas tamen periodos ad 8. 10. &
14. dies passa sit, antè annum nunc circiter
pleuritide defuncta.

Quod de Martialium gemina virtute, quâ & a-
perire & adstringere valeant, experientia
confirmat, idem de hisce thermis statui posse,
per dicta hætenus constat. Nec inficiandum
quidem est, sicut aliorum metallorum & mi-
neralium, ita etiam Martialibus eas pollere
particulis. Utrum verò ab his, an ab aliis,
quas admirabili vi in unum quasi coëgit divi-
na sapientia, memorati effectus proveniant,
infallibili ratione determinabit nemo. No-
bis sufficiat à posteriori & ab effectu intelli-
gere, quod & reducere morantes, & sistere
menses nimios calidarum ope valeamus, im-
primis si cum regimine justo, prudentique
consilio cura instituat.

Histo-

Historia X.

*Lancinans artuum dolor, fœminam vexans,
thermis in auxilium adhibitis, successivè e-
vanescit.*

Eodem anno Mense Junio Domini F.
uxor XXVI. annorum, lancinante ar-
tuum dolore, appetitu dejecto, respi-
randi difficultate, vigiliis, diu conflictata,
naciem totius corporis tantam contraxe-
rat, ut cutis vix ossibus hæreret. Thermo-
rum verò auxilio confisa cùm potationis,
cùm balnei curam ad 7. dies ex præscripto
geminavit, ad XXX. ollulas ebibendo, tantâ
successus felicitate, ut & somnus ac appeti-
tus, nec non plenior spirandi libertas redi-
ret, dolor verò successivâ remissione evane-
sceret. Hinc recollectis domi viribus car-
nem augescere, faciemque vivido suffun-
di denuò colore sensit. In sequenti anno
teravit curam insigni valetudinis commo-
do, ita ut in hunc usque diem adhuc sana &
ncolumis persterque ac duret.

- (1.) Quæ de XXX. ollulis dicta, de summa nimie-
rum dosi intelligenda sunt. Nam à tredecim
ollulis initium faciens paulatim ascen-
dit, donec sufficere visum est. (2.) Balneum
pri-

primæ curæ vix ad tres quadrantēs horæ pertulit, languore moram prohibente longiorē. Alterâ tamen periodo jam aliquantulum validior factâ ad sesquihorâ duravit cum euphoria. (3.) Quod anno proximo repetierit curam, firmandæ omninò sanitati conduxit.

Historia XI.

Serenissima Princeps malo hypochondriaco, scorbuto, ac ulcere, rheumatico laborans usu calide in pristinum statum quodammodo restituitur.

Sereniss. quædam Princeps 50. supergressa annum, obesi serosique habitus, à longo tempore mali hypochondriaci & scorbuti affectione, à decem vero annis ulcere rheumatico pedis dextri infra suram laboraverat. Adhibito frustra diuque magnifico medicamentorum apparatu, thermas tandem ante hos septem annos adiit, maximè postquam scabiem pruriginosam dicto pede efflorescere persensit. Præparatione debitâ ritè præmissâ 6. dierum potationem continuavit ad XXV. ollulas perveniendo, quibus mirum dictu quantum feculentæ materiæ reje-

rejecerit. Hinc balneum intravit 5. dies, muniendo semper pedem lintheaminibus plurimum duplicatis, ad arcendum aquæ immediatum contactum. Secundæ curæ die secundo impetuosa admodum operatio alvum ultra 30. vices deplevit; hinc ipsa languida nonnihil tertium diem quieti tribuit. Sed refecta familiari sibi ad vires recuperandas medicinâ, sequentibus tribus diebus consuetum ollularum numerum exhauriendo satis bellè habuit, balneumque inde ad 5. dies adhibuit. Cum in tertia bibendi periodo verferetur, pruritum cum scabie pedis perire sensim advertit, quem subsequens balneum totum denique profligavit. Ulcus quidem purius, sed ad cicatricem non perductum est. Cæteræ invaletudinis diuturnitatem minor molestiarum sensus consolatus est, ita ut hiliori, quàm accesserat, animo discesserit optima Princeps nunc ante biennium apoplectico affectu è vivis sublata.

Quod secundo die sub altero potationis circuitu effrenis adeo operatio se exseruerit, non mirabuntur, qui sedulos thermalis curæ se exhibent observatores. Ple-

H

rumque

rumque enim eò tempore vel morbi causa propius evoluta tumultuatur, vel aquæ vis saturationis punctum adepta plenius se explicat. Appositè autem tunc unus vel alter dies intermissione datur, donec recollectis viribus ad pensum redire, postliminiò liceat.

Historia XII.

*Virum offert catarrhis obnoxium, curamq;
ejus thermarum stillicidio peractam.*

Vir XLVII. annorum, staturâ corporis procerâ, sed gracili, catarrhalibus subinde affectibus obnoxius, incidit in dolorem humeri dextri, ejusque articulationis, ita ut ad levissimam vel ex improvise commotiunculam ille intenderetur, ac nocte imprimis sæviens somnum penitus fugaret, absque ullo tamen notabili tumore aut rubedine. Auxilii nihil attulerunt, cum interna medicamenta catarrhis debita, tum externa, suffimenta, puta varii generis, fotsusque sicci ac frictiones cum linteaminibus calidis. Tandem deventum est ad thermarum stillicidium, quo vel bis in die per horam adhibito

bīro non tantū dolor expiravit, sed brachium ex arbitrio movendi facultas in libertatem vindicata est.

- (1.) A lymphā forsan crassiore expansiones tendinosas obsidente malum traxit originem. Hinc calor stillatitiā quasi vi impressus penitiūs partem affectam potuit penetrare, & impactam s. stagnantem lympham discutere. (2.) Ex allato exemplo colligitur, quod affectibus per multis cum fructu adhiberi stillicidium hujus calidæ queat, modò ad præscitum & ordinationem experti Medici cura suscipiatur. Sic memini cujusdam juvenis XXIII. annorum, qui dolore circa medium futuræ Lambdoideæ, imprimis noctu torquebatur, quem curæ mercuriali olim non satis providè administratæ attribuat. Hic thermas ingrediens ab illarum aqua stillatim adhibita ingens se solatium, imò doloris omnimodam sublationem percepisse affirmabat. Continuaverat autem ejus usum per 3. septimanas, ac sæpè per tres aut quatuor horas, incio Medico, capiti calidam super instillare patiebatur.


Historia XIII.

Sterile conjugium usu Carolina fecundum efficitur.

QVam suavis formæ gratia commendabat, honestissima fœmina XXII. annorum per biennium in sterili conjugio vixerat. Quæsitæ ad rogatum, mariti per Medicos de valetudinis suæ conditione, nihil querelarum regessit, nisi quòd capitis subinde dolore vexaretur, & à congressu semen vel mox elaberetur utero, vel ad diem vix unum retineretur. Adhibere medicamenta cùm multa nollet alia, thermas elegit, quas successu exoptatissimo usurpavit, præscriptæ sibi methodi quoad potationem & balneum, nec non medicamina quædam externa observatrix accuratissima. Dimidium verò itineris versus patriam vix absolverat, cùm obviam ipsi venit maritus, ruitque in amplexus desideratissimæ conjugis. Hinc fausto deinde sidere ipsam deduxit domum, ut post 9. extemplò menses puellam formosissimam pepererit. Sed biennio

nio vix exacto cū denuò esset enixa, post pauculos dies febre correpta obiit, non sine summo suorum desiderio.

Medicamenta externa pro tollenda sterilitate varii generis solent adhiberi, scilicet infusus, suffitus, emplastra, inunctiones &c. Cujusvis verò judicio præconceptis opinionibus non onerato relinquo, num illa convenientissimè applicentur statim post thermarum egressum? Nam cum pori & meatus cuncti partium, circa uterum vi hujus calidæ peculiari afficiantur, topicorum vires commodè superadditæ effectum, forsan certiore promittent.



Historia XIV.

Ascitem nondum confirmatam Matrona thermales aqua curant.

Quantum valeant thermales aquæ in percuranda ascite nondum confirmata, exemplò comprobari potest matronæ perillustreis, LVII. ætatis anno jam constitutæ. Intumuerant paulatim pedes, mox abdomen quoque, quod attactum insignem duritiem præ se ferebat, cum siti vehementi, ciborum fastidio, spirandi difficultate, colore faciei mutato &c. Curam potationis primam 6. diebus perfecit, incipiendo ab II. ollulis, atque ad 25. ascendendo. Hinc quatrimum balneo datum, ita ut mane post septimam, à meridie post quintam insidens, ad minimum horam unam vice singulâ consumeret. Duæ autem his subjunctæ adhuc curæ sunt potationis, nec non balnei duæ. Quælibet 4. circumscripta diebus satis commodè cessit, abdomine emollito & subsidente, nec non pedibus detumescantibus, ac fastidio multum imminuto. Saltem illis diebus,

diebus, cūm biberetur, circa 4. quintam-
que pomeridianam borborygmi subaudie-
bantur, quos interdum capitis dolor in-
vesperam usque excipiebat. Balnei autem
diebus saliva viscida sitim aridam osten-
debat. Domum redux sensim convaluit
plenissimè.

- (1.) Curatio hīc citra prævium purgans ini-
tium sumpsit, quod alvus in itinere ad
thermas quotidie aliquot vicibus fluxe-
rit. In tali enim casu quid catartici u-
su opus, cūm aquæ calidæ vias jam lu-
bricas inveniētes facilè valeant pene-
trare. (2.) Borborygmi exsurrexerunt,
quod distendentis aquæ quædam portio
intra intestinorum claustra adhuc fluctu-
averit, quæ flatus concitavit hinc inde
vagantes. Hinc opem attulit medica-
mentum carminativum eo tempore pro-
pinatum, quod & aliis in simili casu pro-
fuit egregiè. (3.) Sitim quàm optimè
compescuit accidularum haustus præsen-
taneo levamine.

Historia XV.

Fœmina vehementi tussi laborans virtute Carolina pristinam sanitatem recuperavit.

ANNO 1693, fœmina XXXI. annorum, scorbutica & fluori albo obnoxia, inter cœnandum cum amicis datâ occasione in risum non mediocrem, effusa vehementi tussi correpta est, quæ ultra duas horas ad somni usque tempus perduravit. Postero mane è lecto surgens, iterum validâ tussi sed inani impetitur, quæ deinde quasi lege quâdam singulis diebus manè rediens cum augmento, languorem, satis molestum post se traxit. Primis aliquot septimanis tussiendo nil ægra potuit exantlare; saliva tamen eaque viscidior magnâ abundantia profluxit, appetitu prostrato, & dolore in pectoris meditullio percepto, cum maciè totius corporis insigni respirandi difficultate, ita ut in neutro cubare latere, nec progredi celeriter, aut scalas accendere, nec hymnum cantare, potuerit. Ab usu medicamentorum quæsitissimorum paululùm quidem melior facta,

cta, molestissimos tamen tusiendi conatus
quotidiè manè & interdiu, quandoque e-
tiam sub lecti introitu perpessa est, à quibus
sputum denique album, viscidum ac cras-
sum ejecit. Thermarum itaque præsidium
expertura ad potationem statim se ac-
cinxit, quòd alvus plus justo fluida catar-
cticum minùs videretur requirere. Pri-
mâ vice deplevit ii. ollulas, unde octies de-
jecit: postero autem mane cum vix octo
exhaustisset, tam enormis infecuta opera-
tio est, ut intranz. horas 38. vicibus fluidis-
simam alvum exonerare cogeretur. Hinc
exorto languori consultura proximum di-
em quieti; sequentes verò quatuor balneo
dedit. Tum verò de novo potationem
exorsa, cum absque molestia illam ferret,
5. dies continuavit, summâ ollularum dosi
ad 19. perductâ, quibus per omnes tres vias
copiosa satis egestio procurata est. Itaque
colophonem curæ imposuit blando purgan-
te, quod deinde balneum 5. dierum excepit.
Ab illo tempore, postquam domum per-
venerat, sensim pristinas vires recupera-
vit, tusi, dolore pectoris, spirandi difficul-
tate omnimodè sublatis. Cum appetitu
autem restituto gliscere carnes musculosas

H 5

ha-

hactenus flaccidæ denuò cœperunt, ac novum corpori robur infundi.

Alvum fluidam cum ægra attulerit ad curam, facile apparet, in motu extitisse humores, qui subdito calidarum stimulo secundo statim die cum impetu exierunt. Hinc benignior fuit secunda cura, scilicet subtracta jam noxiarum saburrâ. Ultra tamen 5. dies bibere, aut tertiam superaddere curam non expedivit, quoniam sufficiens jam facta evacuatio ac præterea languoris ratio habenda erat.

Sed quid juvat, omni morborum genere cumulas huc referre historias? quid commodi ad Lectorem, si porrò viderit memorari, prodesse thermas, in tremore, in contracturis, in spasmo, in phtisi à morbida spirituum humorumque diathesi oriunda, in hæmorrhoidibus tam cæcis, quam in initium fluentibus, in malo ischiatico &c. quorum omnium curationes vi calidæ nostræ peractas pari descriptione possemus tradere. Potius experietur quilibet thermas visitaturus, me minus forsân dixisse, atque debebam. Nam ecquis magnificè satis illarum virtutes deprædicabit incomparabiles

es planè? liberrimâ provocatione appello
idem doctiorum quorumvis & versatissi-
morum in arte cùm chemica, tùm Medi-
ca, num medicamentum producere vale-
unt, quòd pari vi, sed pari simul benignita-
te thermarum vires adæquet? quod & al-
vum multoties, & lotium ac sudores ple-
nis quasi rivulis moveat, idque unâ eadem-
que horâ, ac citra virium notabile dispen-
dium, quodque plures continuasse dies va-
etudini expediat. Qui tale demonstrave-
rit pharmacum,

- - is Phyllida solus habeto.

Quemadmodum verò ex discursu nostro
facile innotescit, quòd thermarum usus
pateat quàm longissimè: ita iudicio pol-
lens Medicus haud difficulter advertet, non
in omnibus tamen promiscuè affectibus e-
as citra insigne periculum adhiberi posse,
v.g. qui febribus acutis aut malignis deti-
nentur, aut qui viscerum labem vel ulcus
in abdito alunt, quâcunque id hæserit par-
te, qui propè absunt ab infirmitate sum-
ma, aut mortem in procinctu habent &c.
à thermarum usu omninò debent absti-
nere.

Qui-

Quicumque ergo virtute excellentissimi
hujus remedii valetudini suæ consulere ge-
stir, experti Medici sententiam antè au-
diat, quàm curæ se tribuat. Tùm verò
successu prospero illam fortunabit Divinum
Numen, quod omnibus ex animo
• precor voveoque.

F I N I S



Errata.

- pag. 15. lin. 2. lege: tanta.
pag. 20. lin. 11. lege: affuderunt.
pag. 26. lin. 20. pro si plus, lege: sic plus semper.
pag. 27. lin. 21. pro jecti, lege: jecto.
pag. 31. lin. 4. lege: affectas.
pag. 45. lin. 12. lege: allegabam.
pag. 50. lin. 16. pro magna tum, lege: magnatum.
pag. 54. lin. 7. lege: Est sanè.
pag. 61. lin. 12. pro resistant lege: resistent.
pag. 65. lin. 19. pro explorata lege: explosa.
pag. 66. lin. 9. lege: utrasque.
pag. 70. lin. 10. lege: gravibus lypo-
pag. 72. lin. 20. pro aviditate, lege: ariditate.
pag. ead. lin. penult. pro spinosâ, lege: spumosâ.
pag. 77. lin. 4. lege: Meâ igitur.
pag. 78. lin. 14. lege: assuetis.
pag. 83. lin. 8. lege: pag. 71.
pag. 86. lin. 13. potio, lege: portio.
pag. 97. lin. 10. tantum urina arbitrio.
pag. 97. lin. antipenult. pro putatâ, lege: mutatâ.
pag. 98. lin. 6. lege: refri-
pag. ead. lin. 7. lege: dyspnæam.
pag. 99. lin. 8. â thermarum, deleatur â.
pag. 100. lin. ult. lege: dolorum.
pag. 101. lin. 15. innotesciti, deleatur i in fine.
pag. 108. lin. 20. pro denuò lege: periodicè.
pag. ead. lin. 21. pro tandem, lege: post 3. annos.
pag. 113. lin. 13. lege: versaretur.
pag. 115. lin. 19. tribuat, lege: tribuebat.
pag. 120. lin. 2. lege: virtute.

